

李文忠公奏稿

李文忠公奏稿

卷之六目錄

分路進剿摺

同治三年正月十八日

克復宜興荆溪縣城摺

同治三年二月初一日

圍攻嘉興片

同治三年二月初一日

各路攻剿情形片

同治三年二月初一日

收復溧陽並江常錫次第解圍摺

同治三年二月二十日

猛攻嘉興片

同治三年二月二十日

克復嘉興程學啟受傷片

同治三年二月二十日

前撫徐有壬請建專祠片

同治三年二月二十日

克復嘉興詳細情形摺

同治三年二月二十八日

洋藥票稅毋庸再徵片

同治三年二月二十八日

近日軍情片

同治三年二月初九日

沿江腹地肅清摺

同治三年三月初九日

常州合圍摺

同治三年三月二十一日

程學啟請卹摺

同治三年三月二十一日

溧陽官軍截剿金壇竄逆獲勝摺

同治三年三月二十九日

常州近日軍情片

同治三年三月二十九日

克復常州摺

同治三年四月初七日

戈登加銜榮寵回國片

同治三年四月初七日

進規丹陽援應溧壩片

同治三年四月初七日

丹陽克復派兵接守句容東壩摺

同治三年四月十一日

裁遣常勝軍摺

同治三年五月初二日

分剿湖州進逼長興摺

同治三年五月十七日

請俟湖州克復再協攻金陵片

同治三年五月十七日

克復長興摺

同治三年五月三十日

鼎軍吳淞獲勝片

同治三年五月三十日

籌畫湖州金陵緩急片

同治三年五月三十日

李文忠公奏稿卷六

全集一之六

桐城吳汝綸編錄

分路進剿摺

同治三年正月十八日

奏爲縷陳近日軍情並督籌分路進剿大略情形恭摺奏祈
聖鑒事竊嘉善克復奔牛解圍經臣於上年十二月間疊次奏報
在案常州踞逆自十二月二十一日後更番出擾二十七日由西
門過河築二土營抄出劉銘傳營後二十八日劉銘傳督隊攻毀
其營護逆率大股出城援救自午戰至薄暮乃罷營哨各官傷亡
數人二十九日城賊出撲東門頭卡經張樹聲張樹珊等督隊擊
走之新歲以來該逆堅伏不出惟於西門外通丹陽宜興大路添
築營壘數十座我軍偏紮東南北三門緣常城過大兵數稍單未
能遠圍合圍而賊勢漸衰亟須設法攻打探聞李秀成仍欲句洋

匪赴滬購導小輪船駛入太湖以備竄擾臣正在嚴飭查禁適戈
登與總稅司赫德自崑山來蘇謁見謂與臣解釋前憾再商協剿
先是臣疊准總理各國事務衙門密函以英公使初欲臣挽留戈
登嗣接戈登及英繙譯梅輝立等來信於蘇城殺僞王一事忿恨
不平屬臣在外相機調處臣深知戈登性情忿熱而急於見功彼
自克復蘇州時偶與臣意見參差遂聲稱舉兵構衅臣處以鎮靜
置不與較英提督伯郎屬令帶常勝軍駐崑山不歸臣處調遣自
是戈登不通往來兩閱月矣臣亦若無其事該軍月餉及賞卹雜
支銀兩仍竭力支應彼見臣毫無掣肘之嫌臣軍又獨克無錫金
匱平望平湖乍浦海鹽嘉善各城並不借該軍之力未嘗不感動
而愧悔也因赫德來蘇之便臣面屬轉致戈登善爲解說戈登乃
於十二月二十五二十九日兩次來謁臣迎機開導願告奮勇由

無錫進剿宜興以扼洋人濟賊之路兼助官軍攻常之勢自不得不允其請藉敦和好而維大局正月初旬英緝譯梅輝立自滬馳書責戈登以負約將來伯郎由香港回滬必不謂然戈登竟不之顧於正月十二日帶隊由崑啟行次日過蘇城謂臣曰如公使有信寄我求勿速交俾得專心打賊又請臣派提督郭松林一軍並淮揚水師數營與之同進宜興臣當飭李鶴章調派郭松林所部六營黃中元滕嗣武五營及王東華成俞卿鄧長里水師三營與常勝軍會合進剿並屬李鶴章郭松林等出意聯絡俾爲我用又飭李鶴章劉銘傳於常勝軍攻打宜興時分督各軍猛攻常城使賊首尾不能照應或可先後得手此各軍分道進剿常州宜興之大略也浙西自蕪善復後劉秉璋督所部進紮新豐蕭山門一帶程學啟督所部劉士奇六營進紮王江涇浙信嘉興十二月二十

一曰僞榮王虜發受分股由東南兩門出撲劉秉璋派隊迎擊東門一股潘鼎新派隊迎擊南門一股各戰數十合大破之擒斬溺斃無算追近城下榮逆乃於二十九日遞稟乞降臣飭程學啟劉秉璋等移營進佔蔡奪安辦連日雨雪載塗士卒俱凍昨甫開霽程學啟親督四營進紮金橋並派開字奇字等營陸續紮西北兩門李朝斌率太湖水師繼進相爲依護劉秉璋同吳毓芬四營進紮七里店餘營亦由東路滾紮潘鼎新海鹽平乍各營隨後接應程學啟等屢帶小隊赴城根偵看賊中布守甚嚴恐其別有狡謀必須合力痛勦探聞浙江藩司蔣益澧新受海甯州賊酋蔡元隆之降蔣益澧折回杭州老營調蔡元隆數千人協勦嘉興已紮西門三塔寺一帶但未准左宗棠蔣益澧知照不知是否確實臣惟飭程學啟劉秉璋等穩慎會攻迅規嘉郡以固蘇滬門戶此各

軍分道進剿嘉興之大略也臣伏讀正月初二初六等日

寄諭左宗棠謂曾國藩亟應分兵以取廣德李鴻章急應由無錫攻宜溧著悉心商酌謀出萬全等因欽此查李秀成李世賢二酋窮無復之將來必由句容溧陽廣德一路竄走浙皖交界而入江西臣軍從下游節節仰攻勢不能繞越賊區扼斷竄路以臣現處境地現有兵力欲保蘇滬不得不分攻常嘉以剿爲堵其圖常州也將以聯鎮江之氣外堵其北竄長江內堵其繞竄腹地也其圖嘉興也將以掣杭賊之勢外堵其竄越海塘內堵其回竄松滬也至由金陵溧陽竄皖浙之路臣力萬不能及想在聖明洞鑒之中昨因戈登欣然效順令其協同郭松林等進搆宜興但可以爲奇兵而不可以爲正兵戈登舊往有餘堅忍不足且其性情忽離忽合尙不知此後有無變態如果常州宜興次第攻

克或分擣溧陽旁略丹句遲速利鈍殊難逆料而兵勢自北而南路徑叢歧亦難保賊眾不由南路竄走若常宜得手後賊以全力由句溧一帶突竄自當謹遵

諭旨分飭將士緊蹣力追與東壩西浙各軍前後夾擊昨准曾國藩緘商欲調程學啟赴金陵協攻程學啟先已進兵嘉興難遽撤退應俟嘉郡克復守局穩固再飭程學啟移軍西向屆時商酌調派總期於兩面大局皆有裨益除俟各軍若何攻剿情形續行陳奏外所有近日軍情並督籌分路進剿各緣由謹繕摺由驛馳陳伏乞

皇太后

皇上聖鑒訓示再欽奉

寄諭垂詢奔牛降西邵之倫是否卽係邵小雙查邵小雙係賊中

偽目因招降後死守出力臣查取其官名請獎前摺漏未聲敘理
合據實附陳謹

奏

克復宜興荆溪縣城摺

同治三年二月初一日

奏爲水陸官軍攻破賊營擊敗援賊乘勝克復宜興荆溪縣城恭摺仰祈

聖鑒事竊派郭松林六營黃中元滕嗣武五營王東華成俞卿鄧長里水師三營會同戈登李恆嵩之常勝軍進剿宜興經臣於本年正月十八日

奏明在案李鶴章恐我軍力單難期速克又令總兵楊鼎勳率所部五成隊由常州赴宜協剿先後進紮河橋正月十九日戈登派洋將美敘羅殿至宜興城下察看地勢河道郭松林等帶隊同至北門外逆眾迎敵十里橋郭松林揮隊痛擊賊爲卻走我軍隨將近城各賊卡一律燒燬直逼城根賊由東西兩門而出北門敗賊仍開城出拒四面困裏於是滕嗣武鄧長里水陸二營當東門之

賊黃中元成俞卿水陸二營當西門之賊郭松林楊鼎勳王東華水陸三營當北門之賊分路合剿相拒移時賊眾收潰我軍追斬溺斃無數生擒三百餘名而郭松林被賊洋鎗子擊穿右肘滕嗣武擊傷右腿弁勇間有傷亡二十一日戈登李恆嵩率隊由河東進郭松林等各率所部由河西進水師各營沂流而上前任宜興縣知縣周守典亦帶團勇鎗船助剿二十二日各軍進紮三里橋是夜總兵曹仁美會同戈登李恆嵩攻東門外賊營郭松林等分攻上湖橋及西門外賊營並截溧陽援賊二十三日黎明戈登先以炸礮轟倒偏左石壘其偏右賊營立即驚遁郭松林楊鼎勳亦將上湖橋賊營三座一併踏毀維時黃中元滕嗣武力攻西門賊營正在得手僞代王黃靖忠大股援賊由張渚直達西沈捨舟登陸倏分兩路一由城南抄至城東一直奔城西郭松林等嚴陣以

待一而知會戈登一面約王東華等水師並派副將王平西戰船
赴東沈協同戈登迎勦未幾西路之賊漸次撲近我軍屹立不動
祇以洋鎗排擊該逆死傷相繼尙無退志當派總兵吳勝清循湖
而進抄其左總兵彭述清游擊李永元由近城小路抄其右而令
副將高占彪周河清等直搗中開奮呼殺入逆眾三面受敵遂不
能支各軍勇氣倍增賊甚夥其抄往東門之賊經戈登等排列
炸礮洋鎗攔頭擊斃千餘名敗逆向西狂奔復經各水師橫擊之
自東沈至西沈追殺四十里燬奪大小賊船千餘隻旗幟器械無
算先後斃賊數千名此二十三日戈登郭松林等各軍攻破東門
外上湖橋等處賊營並擊敗偽代王大股援賊之實在情形也援
賊既敗外營又蕩無一存城賊勢孤膽裂是夜亥刻戈登乃督礮
隊攻東門滕嗣武攻北門游擊王萬釗參將劉起應之黃中元攻

西門總兵易用剛副將黃式壽應之吳建瀛率副將顏邦桂宋德鴻等攻南門高占彪周河清應之曾明魁廖玉林紮於西汊沿河爲水師策應王東華成俞卿鄧長里王平西水師分布東西兩汊開礮轟擊又飛調松正勳正兩營填紮上湖橋賊壘以杜竄路三更校戈登等愈攻愈緊賊勢窮迫開西門而逃戈登飛騎馳至與黃中元併力合擊郭松林令已革參將李長樂帶馬隊追殺該逆竄逸無多餘眾涕泣求降各軍遂分門按部而入於正月二十四日卯刻克復宜興荆溪縣城所有城中降眾悉令薙髮分別遣散仍留黃中元滕嗣武陸師五營鄧長里成俞卿水師二營駐守先是探報句容丹陽之賊數萬議分南非內犯冀解常州之圍李鶴章往無錫與戈登籌定進取機宜卽馳回常州督勦該逆以大隊由西門橫排至東北三十餘里游氛竄遁江陰之西石橋李鶴章

令張樹聲抽四成隊赴北門與劉銘傳合剿二十二日辰刻該逆
列隊脫衣前來搦戰我軍鎮靜以待午後劉銘傳張樹聲乃令各
軍裹旗出營膝行五里伏河岸下各營官帶小隊分道誘敵鏖戰
至西佯作收隊之狀方退半里該逆大隊蹙來我軍且戰且走左
右伏兵齊出鎗如雨注賊駭而奔我軍回戈追擊擒斬六七百名
又溺斃無算奪獲馬匹鎗械甚多援常之賊亦稍挫退山李鶴章
將前後戰狀彙報前來臣伏查宜荆二縣瀕太湖西岸毗連三郡
乃江浙之通衢常州金陵之後路我軍攻常兩月未下正以兵力
單薄未遑分取會戈登欲圖自效臣因於常州水陸各軍抽派精
銳會同前往先破附城十餘巖壘敗溧陽大股援賊不出旬日速
拔堅城從此蘇錫之防益固常州之克可期實於大局有裨郭松
林右肘受傷稟創督戰戈登奮勇神速所向克捷應與楊鼎勳黃

中元滕嗣武王東華等俟常郡克復再行彙案請

旨優獎其攻破賊巢首先登城之諸將自應先行獎勵以昭激勸

提督銜記名總兵李恆嵩可否

賞給勇號提督銜記名總兵成俞卿可否

賞給一品封典總兵鄧長里易用剛可否

賞加提督銜江錫克復案內擬保副將黃式壽可否卽以副將儘

先補用擬保游擊廖玉林可否卽以游擊儘先補用以上二員並

請

賞給勇號儘先補用副將宋德鴻四川補用副將高占彪可否均

賞給勇號副將銜福建補用參將劉起可否以副將補用儘先游

擊王萬釗李永元可否均以參將補用已革副將銜參將李長樂

可否以游擊補用前任宜興縣知縣周守典可否免其查辦失守

罪名仍帶革職處分出自

逾格鴻慈其餘出力人員陣亡弁勇俟查明彙案獎卹所有水陸
官軍克復宜荆縣城緣由謹繕摺由驛馳奏伏乞

皇太后

皇上聖鑒訓示謹

奏

圍攻嘉興片

同治三年二月初一日

再程學啟劉秉璋等進規嘉興由東北兩門外滾紮經臣於正月十八日奏報在案十九日程學啟親督所部築壘搭橋水陸排隊防護偽榮王廖發受偽挺王劉得功果山北門出賊萬餘衝突程學啟令王永勝陳忠德葉廷杓張行科朱寶元何安泰陳有昇等向前堵剿自督小隊調度賊排鎗風湧屢戰少卻復以礮船轟我紮營之地因令水師歐陽利見徐佩瑛費金綬謝世彩等由正塘抵禦親督陸師猛撲賊復於西門出數千人程學啟令劉士奇張家瑜趙三德梁安邦等由西路擊之兩面環攻斃悍賊多名騎馬黃衣賊目二名擒斬偽凌天義一名擲其首賊隊中賊乃奔潰乘勝掩殺數百名我軍因濠壘未就收隊趕築完竣劉秉璋亦於是日移駐朝陽廟分布各軍進紮七里店會龍橋一帶二十三日潘

鼎新復率二營來會程學啟等籌商以東北門外賊壘棋布憑河築石多而且堅必須分進猛攻先剗其罌乃可攻城程學啟所部陸師與淮揚太湖水師攻北門外之杉青關御花園端平橋及北門迤西等處賊壘而附近之秋涇橋則員外郎李昭慶一軍主之劉秉璋潘鼎新所部水陸各營攻東門外之吳涇橋及東塔等處賊壘而附近之合歡橋則道員吳毓芬一軍主之二十四日四鼓程學啟卽令所部分五路進劉士奇率陳有昇梁安邦彭連陞張家瑜由正塘之左王永勝率張行科葉廷枏龔生陽朱寶元由正塘之右左日昇趙三德于奇津由裏塘之右何安泰由中路直偪劉玉龍與教練洋人備雷攜炸礮亦由中路轟擊水師歐陽利見率費金綬謝世彩鄧金楚各船依護陸路而李朝斌親督太湖水師由官塘進張自全率勇站隊守新塍來路程學啟自率親兵往

來督戰五鼓齊達賊營賊奮起抵禦我軍連開炸礮千餘甫將營
牆攻塌城逆突出萬餘分路包抄子如雨注與賊兩面橫衝我
軍前隊已爲撼動程學敏督親兵由小西門繞城河以達北門
抄入賊後陳忠德何安泰督師繼之王永勝葉廷杓等由後路襲
擊李朝斌與歐陽利見等師陷左右環攻自卯至未始將賊擊
退劉士奇梁安邦陳有昇遂踰賊左壘而進何安泰陳忠德張行
科朱寶元趙三德俱督勇分爬賊營各軍鼓勇爭先立將小西門
北門外等處石營七座一律攻燬生擒僞天將劉得福僞慕天義
賈慕仁陣斬悍賊千餘名生擒數百名奪獲大礮五十餘尊我軍
弁勇傷亡五六百名記名提督劉士奇水師總兵周正林均受鎗
傷守備姜寶勝臨陣退縮斬之以徇李昭慶攻秋涇橋之軍黎明
時令張紹棠率兩陸營由思賢橋當賊壘而進水師董正明由橫

港橋攻其右曾敏行由太平橋攻其左賊初伏匿適城賊齎送子
藥壘賊出接我軍排鎗擊之張紹棠乘勢猛撲橋後石壘各勇踰
濠爬牆水師亦直前衝截賊隊不能歸營守賊驚亂奪門潰走橋
頭石壘之賊見勢不支亦卽出奔截殺百餘名餘俱遁入城內秋
涇橋兩賊營皆破李昭慶派兩營駐守之此北路踏營獲勝之情
形也東路吳涇橋賊於橋西築大石壘一座迤北土壘一座又北
合歡橋邊新築一壘皆臨大河與東塔邊一壘互相犄角是日劉
秉璋潘鼎新令黃仕林吳長慶張應魁潘國揚唐宏成黃桂榮等
由中路直撲大石壘王占魁帶選鋒乘鎗船與水師二營由大河
掘壩而進曹廣澤萬重暄袁發錢玉興劉廣福站隊南岸專擊援
賊吳長慶等進佔賊濠猛撲數次賊鎗礮甚密我軍傷亡枕藉吳
長慶中鎗貫肘猶奮臂拔橋下濠賊從牆上拋擲火彈劉秉璋等

調礮隊於南岸轟擊王占魁已掘壩駛抵賊壘潘國揚唐宏成諸
桂榮亦率隊奮呼齊至濠邊潘國揚額受鎗傷裹創鏖戰黃仕林
聶桂榮等拔幟先登黃仕林臂受鎗傷聶桂榮面受矛傷腿受鎗
傷仍搖旗揮軍各勇一擁而上當將大石壘攻克刀砍矛刺賊無
得脫土壘之賊見我軍抄過其後始欲潰退經各軍截殺殆盡東
塔邊之賊亦卽棄壘狂奔追殺數里直至東門方戰之時東門突
出大股又從南門繞出各數千人將包我後萬重喧曹廣澤袁發
等擊走之追至東南角之鹽倉橋我軍弁勇傷亡百餘名吳毓芬
攻合歡橋之軍由六里街進先於河南列隊以防賊抄水師熊殿
元由大河而前陳占榜余嘉釐由六里街之後直抵賊壘吳毓芳
率吳毓蘭繞至北面羅義勝帶礮船駛至橋口轟賊石營賊見我
軍四面兜擊城內卽出悍賊數百伏北面新築卡內阻河死守而

卡西列大隊禦我吳毓芬令吳兆楣於河邊連發炸礮數十中傷
無數悍賊仍伏卡不動吳毓蘭陳占榜率選鋒三十名冒險搶渡
羅義勝礮船繼之萬國本曾得華趙長發同時受傷仍各前進立
破新卡擒斬黃衣賊目四名余嘉龍等大隊畢渡合力猛攻拔椿
爬牆石營亦破截殺淨盡弁勇傷亡亦數十名此東路踏營獲勝
之情形也查嘉興榮逆前曾乞降以緩我師程學啟等察知其詐
定議痛剿果以死拒經我軍竭力苦戰將士傷亡頗多而殺傷悍
賊亦數千計東北門外隘口多壘均已燬平惟餘城根一營卽日
乘勝偪勒合攻城垣以期漸次得手惟湖州踞賊圖援嘉興屢窺
南木壇邱匹子新塍等處意欲撲犯盛澤平望兩鎮擾我後路
臣先商派李朝斌水師數營及淮揚水師楊宏勝擇要駐防其竄
四亭子者二十三日爲李朝斌所部擊敗其竄壇邱者二十日爲

楊宏勝擊敗其大股由南路過河竄繞新塍鎮臣飭程學啟李朝斌隨時分隊扼堵庶保無虞此次出力將士陣亡員弁可否容臣查明彙核分別獎卹出自格外

恩施所有官軍進規嘉興分路攻克賊壘大獲勝仗實在情形理合附片具陳伏乞

聖鑒訓示謹

奏

各路攻剿情形片

同治三年二月初一日

再宜興既復自應乘勝進圖溧陽戈登郭松林王東華等水陸六七千人業於二十七八日陸續進發瀕湖之沙棠港踞逆二千餘赴營投誠戈登等已爲招撫惟溧陽爲李世賢老巢實金陵後路咽喉賊所必爭必守之地金壇常州在其北句容丹陽值其西長興廣德當其南面而賊巢各城悍逆左右抄援前與鮑超東壩溧水之軍相隔不能接氣後距李鶴章劉銘傳常州之軍稍遠不及分救孤軍深入轉可危慮臣飛飭郭松林李恆嵩商同戈登穩紮穩打妥慎進止就近密約東壩溧水防軍前後兜擊並催令李鶴章劉銘傳猛攻常郡須先破其西門援賊各壘然後合力攻城西路賊情地勢總以常州爲關鍵常城果卽得手則旁縣可漸次肅清常城若久相持則局勢尙無甚把握至嘉興賊糧最足志在

死守自二十四日程學啟劉秉璋等攻破東北門外堅壘多座二十五日劉秉璋潘鼎新又督軍攻踏東南角鹽倉橋賊壘三座二十七日東門湖南賊壘遁回城中其流沙寺石壘之賊亦殺其偽目李得勝乞降程學啟等會督諸軍直抵城根晝夜開礮轟打惟城賊恃險死拒湖州援賊數萬圍竄後路官軍分投援剿恐尙未能剋期成功所有現籌各路攻剿大畧情形附片具陳伏乞

聖鑒訓示謹

奏

收復溧陽並江常錫次第解圍摺

同治三年二月二十日

奏爲官軍收復溧陽縣城各路敗賊竄併常州西路乘雨內竄圍撲江陰常熟無錫各城調派各軍援剿次第解圍連獲大捷恭摺奏祈

聖鑒事竊臣與克復進圖溧陽並丹句賊股數萬欲圖分路內犯各緣由經臣於二月初一日馳報在案郭松林王東華於正月二十七路由宜興拔隊行至建清地方遇馬步賊三四千當督軍迎勦賊卽狂奔追十餘里殺賊千餘奪馬四十餘匹二十八日郭松林進攻張潛賊營易用剛由後抄擊黃式壽由左抄擊宋德鴻周河清由右抄擊賊棄營遁走生擒千餘名殺斃淹斃無數當將張潛石營土營十餘座一律踏平二十九日戈登由徐舍進攻沿途賊卡壩蕩淨盡侍逆李世賢紮營張潛敗退溧陽詎城中偽酋吳

人杰梁柏和等久蓄反正之心均爲侍逆察覺而止茲官兵壓境侍逆節節挫潰欲遁入城吳人杰等乘機誓眾開門不納城內粵東西老賊先於上年十二月杪由廣德徽浙交界竄往江西現留二三萬眾多係三江兩湖之人二月初一日吳人杰等率同雜髮迎降郭松林文登李恆嵩立允招撫初二日遂將溧陽縣城收復文登帶常勝軍入城駐守臣飛飭文登李恆嵩將降眾妥爲遣散分別安置李世賢聞已逃往湖州四安一帶其所部死黨有帶赴湖州者有竄往常州者郭松林等卽於初三日乘勝進勦金壇援賊初四日抵楊巷地方僞列王褒王率賊船千餘蜂擁而來王東華督水師痛勦逆眾前隊棄舟登岸郭松林督陸軍緣河兩岸奮力抄擊殺斃淹斃並焚奪賊船無算陣斬僞列王及頭目多名賊之後隊轉舵回逃水陸各軍追至金壇南門初五日賊復由西南

門衝出郭松林等督隊擊敗入城遂將城外賊營賊卡數十座一律掃平都司張榮魁死之此收復溧陽縣城追勦金壇援賊獲勝之實在情形也常州護逆先經糾合丹陽句容踞逆偽英王叔僞然王偽章王偽忠湖逆之子眾十餘萬由常西繞至城北築營數十座屢撲劉銘傳各營均卽擊退正月二十六日悍賊數萬繞撲下頭橋況文榜之營該營及鄭龍彪水師擊走之李鶴章商調楊鼎勳二營周盛波二營由南門進紮西門城角初一日正在築壘護逆率眾猛爭楊鼎勳等戰數十合賊乃潰敗未刻濠牆甫就偽英王叔與忠逆之子又率眾繞撲新營楊鼎勳周壽昌等血戰至西賊陣大亂分路追殺斃數千人副將劉起守備彭昌諭力戰死之弁勇傷亡五百餘人然有此大捷賊見圍城各營無聞可乘我軍愈逼愈緊遂繞竄腹地圍解常圍適自二月初二日以後陰

雨連縣旬日不止初四日僞英王叔僞忠逆之子糾合數僞王眾
及宜興溧陽敗賊循江岸迤東圩塘夏港青山一路捲旗薙髮冒
雨急趨初五日奄至江陰之南間距城二三里初六七等日衝至
周莊華市楊厓等處初十日竄撲常熟縣城十一日竄至福山於
是江陰常熟無錫三城同時告警臣卽飛調郭松林王東華棄金
壇勿攻星速回援飭常州各營堅壁勿戰調李鶴章酌帶小隊回
守無錫調總兵楊鼎勳道員張樹聲由常州抽勁旅三千橫紫江
陰之焦塾青陽以截該逆歸路調提督黃中元兩營由宜興回援
並以常熟守兵單薄飭程學敏調鄭國魁水陸三營馳往助戰一
面山蘇州添派參將賈宏材一營由無錫添派道員符信一營由
嘉興添派李昭慶所部二營先後趕至常熟保此要地各軍亦冒
雨遄行於初十一一二三等日次第到防賊股併聚常熟江陰無

錫界內而常熟圍攻尤急符信魏承樾賈宏材朱開泰督勇分守
城堞屢撲不動賊漸蔓延張涇橋東亭直趨無錫十三日李鶴章
登陴督守派黃中元余思樞衛汝忠帶隊迎勦追過八字橋二十
餘里擒斬千餘人郭松林帶馬隊分擊取橋另股又斃百餘名而
無錫之圍遂解張樹聲由焦墊進勦南閘花山一帶楊鼎勳由青
陽進勦郁橋華市一帶日有擒賊初八初九十二等日該逆分股
圍撲江陰經守將駱國忠李正珮張士芳等合力擊退而江陰之
圍亦解逆眾以常熟有糧可掠欲合力攻破此城再圖蘇錫北自
楊庫福山南至顧山王莊盤踞縣互數十里魏承樾等望援急切
適提督黃翼升帶淮揚水師四營遵

旨由揚州折回留一營協守江陰口以杜北竄親督三營於十四
日由白茆口繞進常熟王東華水師三營亦至聲勢已振總兵鄭

國魁與李昭慶並於十五日趕至常熟城內郭松林由嚴家橋進
內外夾擊十六日黃翼升鄭國魁李昭慶分三路出勦鎗礮對轟
兩時之久午後鄭國魁親督選鋒數百名由虞山背後抄擊又分
隊橫衝賊陣賊乃大潰李昭慶飭賈宏材丁全勝猛攻北門賊壘
各勇循山潛伏以進齊至濠邊大呼摩壘而入噴筒火彈拋入營
中燒斃悍賊數百生擒數十名東門之賊糾眾湧至鄭國魁復從
山腳繞出又聞西路戰聲如雷郭松林援軍將至賊前後受敵自
相驚怖我軍乘勢踏平東門石壘土壘五營郭松林是日行至王
莊偽滕王利王二三萬眾迎敵郭松林領隊衝入賊敗至橋口死
拒副將黃式肅匹馬衝上橋頭被賊洋鎗子打穿頭頂登時陣亡
郭松林憤甚督軍一擁而過賊卽返奔追殺二十餘里將顧山陳
市踞賊一氣掃除復由大河徑趨常熟偽英王叔與忠逆之子帶

隊撲來我軍鎗礮連環排擊該逆敗至浮橋黃翼升王東華水師
四路夾勦將逆眾衝作數段生擒及殺斃溺斃自相蹂踐死者不
可勝計追至城西又與鄭國魁等併力截勦賊紛紛潰走各軍猛
追十五六里伏屍數千十七日乘勝跟追又踏毀劉家橋福山賊
壘數座郭松林等遂循江岸追往楊庫鄭國魁等循顧山追勦腹
地而常熟之圍又解矣此調派各軍援勦次第解圍連獲大捷之
實在情形也臣查金陵於正月杪合圍忠逆實在城內准曾國荃
函稱逆糧將盡接濟已斷三四月間可望克復現在常州丹句各
股與金陵消息難通戈登郭松林連復宜興溧陽與皖浙道路又
梗既無可竄之路亦無可據之糧是以乘隙內竄死力衝突幸各
軍分守尙嚴赴援甚速冀可保固大局轉危爲安除飭黃翼升郭
松林鄭國魁楊鼎勳張樹聲等前後夾勦務將此股敗賊悉數殲

除李鶴章劉銘傳再乘勝偪攻常州迅期得手隨後戰狀續行
奏報外其陣亡副將劉起黃式壽都司張榮魁守備彭昌諭劉桂
芳劉維聰千總顧仲學把總唐志同外委徐自成廖學宏狼右營
額外胡慶雲均懇

恩敕部從優議卹其收復溧陽及常熟江陰力戰解圍之員弁兵
勇可否咨臣查明彙案請獎出自

聖裁所有官軍收復溧陽縣城逆股內竄江常錫同時告警分兵
援剿次第解圍各緣由專摺馳陳伏乞

皇太后

皇上聖鑒訓示謹

奏

猛攻嘉興片

同治三年二月二十日

再嘉興官軍於正月二十四五等日連破東北門外各賊壘經臣
於初一日奏報在案程學啟等旋議偪城猛攻先令道員吳毓芬
所部三營扼紮城邊漏澤寺石卡二十七日程學啟親督各營圍
攻一面趕築礮臺二十八日黎明悉眾用炸礮轟擊自辰至未已
塌城垣十餘丈李胡斌水師船搭就浮橋程學啟令何安泰劉士
奇各率一營弁勇併力過河爬城自率陳忠德王永勝繼之餘營
站隊堵剿城逆拚死抗拒洋鎗雨下各將士仍冒險擁上賊以整
桶火藥燃潑下城我軍萬難立足總兵何安泰猝中洋鎗陣亡太
湖水師總兵李助發周正林參將趙三德被創甚重弁勇傷亡已
數百名遂仍收隊適湖州賊酋黃老虎冀援嘉興竊竄盛澤鎮進
圍王江涇後路營盤程學啟急令王永勝鄭國魁等回援於二十

九日擊走之查嘉興四面大河環繞該逆恃險死拒此次猛攻幾
可得手以將士傷亡過多不得不略俟休養礮臺礮架均須修築
嗣後以連旬陰雨停戰十五日後天色晴霽礮具完備程學啟仍
督隊晝夜轟打以期速拔堅城提督銜記名總兵何安泰係程學
啟所部最爲出色之將謀勇兼裕因爬城過猛中鎗殞命實堪悼
惜該總兵紀律嚴明愛民恤士陣亡之日勇丁痛哭恨不身代靈
輿所過百姓執香泣送者數十里據嘉郡紳士兵部員外郎張清
泰等呈請建立專祠前來合無仰懇

天恩敕部照提督陣亡例從優議卹並

准於嘉興府死事地方建立專祠以順輿情而慰忠魂水師副將
郭興發堵剿湖州援賊受傷身故並懇

敕部照副將陣亡例議卹所有官軍猛攻嘉興情形理合附片具

陳伏乞

聖鑒訓示謹

奏

克復嘉興程學啟受傷片

同治三年二月二十日

再正在繕摺開據程學啟專弁飛報連日督率各營會同李朝斌
劉秉璋潘鼎新水陸隊伍攻打嘉興自十六日起滾營紮偏北門
城根護設開花大礮猛攻三晝夜轟坍城垣百數十丈我軍搶搭
浮橋城頭悍逆拚死堵擊矢石鎗礮藥桶噴筒迸落如雨程學啟
懸重賞購死士數百爬城四次不得上至十八日申正二刻程學
啟親率勇士大呼殺入眾隊繼進城上逆屍枕藉猶有悍賊二三
千人以洋鎗排抵缺口程學啟肉薄以登致被鎗子打中左太陽
偏後深六七分長一寸餘登時暈倒該部將提督劉士奇總兵王
永勝等見主將受傷各拚死率隊登城賊仍憑城戰十餘合力竭
潰散遂將嘉興府城克復各軍整隊而入將守城悍逆圍殺淨盡
弁勇傷亡極多程學啟昇回營中氣息未絕急送至蘇城就醫等

情臣立即親往看視程學啟語言蹇澀神色昏迷伏枕流涕但以殺賊未盡爲恨遣醫診治據云創深入骨血流過多幸子已取出尙可設法拯救臣聞其攻城日則來往督隊夜則露坐礮臺指揮照料目不交睫勞苦過甚兼受重傷城破身危殊堪敬憫除飭醫盡心調治派員照料並令劉秉璋布置城守暫飭劉士奇王永勝權統所部協力防剿其克復嘉興詳細戰狀尤爲出力之將領俟查明專摺馳奏外所有克復嘉興府城大略情形並程學啟受傷甚重各緣由謹先附片馳陳伏乞

聖鑒訓示謹

奏

前撫徐有玉請建專祠片

同治三年二月二十日

再據運同銜候選同知徐震燿稟稱職父前任江蘇巡撫徐有玉於咸豐十年四月當賊偏蘇城力籌守禦嗣因逆眾腐至省垣失陷正在督隊迎剿賊已直撲內署力不能禦被刀刺帽將墮尙手自整冠抗聲大罵立時遇害族叔工部主事徐曾庾幕友候選理問鮑鄂銜家人楊安同時被戕次弟候選郎中徐震翼投池水死庶母施氏妹淀姑均自縊僕婦劉氏裴氏亦俱焚死當經前兩江總督何桂清前浙江巡撫王有齡以合署殉難情形具奏咸豐十年五月初八日奉

上諭江蘇巡撫徐有玉著加恩照巡撫例賜卹其妾施氏及子女僕婦等並同時被戕之候選理問鮑鄂銜工部主事徐曾庾均著交部分別旌卹等因欽此經部議

奏請照二品官陣亡例議卹並奉

硃批著予諡欽此各在案今幸於本年十月二十五日蘇州克復
職遂卽匍匐赴蘇尋求遺骨於十一月二十四日尋至撫署前陶
然亭側埋有棺木六具內有黑漆一具開認頭顱骨角的係職父
並於胸際檢得當年辦公圖記一方胸膛間有鎗火傷痕有天平
骨血痕隱現反覆辨認無誤謹備衣冠擇日重殮等情臣當飭令
蘇州府縣前往照料隨卽率同文武僚屬祭奠如禮仍暫厝蘇城
俟該原籍湖州克復旋里安葬並據徐震燿開具履歷事蹟清冊
請

奏前來查徐有壬道光九年進士由戶部郎中

簡授四川成縣龍茂道歷升廣東運司四川臬司雲南藩司咸豐
三年調任湖南藩司五年丁母憂回籍督辦湖州團防八年服闋

奉

旨督辦江南糧臺事務旋升授江蘇巡撫時督臣為何桂清藩司
爲王有齡有王處其閒不苟爲同異外若粥粥無能內嚴厲自守
意將有所設施一旦江南軍潰丹陽繼陷常州棄逃人力無可挽
回獨有一死自靖於封疆守土之義合署從殉忠孝節烈正氣猶
存異乎臨難苟免者矣有王敦尙實學尤精天算貫通中西術居
京師日臺官往往就決所疑闡明四元絕學發有明以來數百年
不傳之祕著有務民義齋算學行於世服官數省所至皆有政蹟
其在湖南藩司任內及回籍團防籌餉募軍屢卻大敵晚受

文宗顯皇帝特達之知遂以死報

國孤忠亮節歷久益繫人思除將履歷事蹟清冊咨送軍機處備
查外應懇

天恩准於蘇州建立專祠其同時殉難之家屬幕友人等一併祔祀以彰忠藎並宣付史館立傳出自

皇太后

皇上逾格鴻慈再有王僅二子次子震翼從死撫署長子正三品廕生候選同知徐震燿當時留籍辦理團防未及於難今得爲有王收骨孤露餘生亦堪憫惻謹並附片陳明伏乞

聖鑒訓示謹

奏

克復嘉興詳細情形摺

同治三年二月二十八日

奏爲水陸官軍合力猛攻克復浙江嘉興府城擒斬僞榮王廖發
受轟斃僞挺王劉得功餘匪悉就殲除恭摺仰祈

聖鑒事竊十八日攻克嘉興府城大略經臣於二十日附陳在案
旋據程學啟等縷晰呈稱我軍自附城仙紮後僞榮王廖發受僞
挺王劉得功率眾數萬死守復句結湖州悍逆黃文金卽黃老虎
四出竄撲圍擾我師十五日雨霽程學啟卽飭各軍薄城當晚親
督梁安邦於端平橋口築月牆護礮黎明賊覺矢石交下幸已工
竣手燃田雞炸礮斃悍賊數百十六日程學啟與李朝斌劉秉璋
等會議猛攻程學啟飭王永勝率陳忠德張行科龔生陽攻城東
北以葉廷杓阮炳福繼之劉士奇率陳有昇梁安邦左日昇彭連
陞直攻北門以朱寶元于奇泮繼之吳毓芬率吳毓蘭吳兆楣陳

占榜余嘉猷羅義勝攻東門以張家瑜張自全堵禦新塍援賊兼
遙攻西門以分賊勢水師歐陽利見率謝世彩鄧金楚費金綬依
傍旱師併力夾擊徐佩璆礮船專搭浮橋劉秉璋潘鼎新派錢玉
興朱六玉扼東門外南湖之口萬重暄曹廣澤袁發由南湖南岸
進攻南門聶桂榮吳長慶張應魁由南湖北岸王占魁潘鼎立夏
金標劉廣福由東馬橋北岸潘國揚唐宏成丁壽昌黃仕林劉鳳
翔王應海由東馬橋南岸三路進攻水師蔡渭川李洪壽徐道奎
會合李朝斌所部入南湖分攻西南東南城角賊於埭口排開巨
礮並擲藥桶焚燒死拒是夜程學啟復飭梁安邦王永勝陳忠德
沿城河添築月牆三座該逆鎗礮甚密各勇縛草膝行且避且築
各軍自此環攻晝夜不息十七日黎明程學啟自率親兵督飭教
練洋人備雷並劉玉龍用開花大礮三面轟擊立毀城頭礮臺二

十餘座塌城垣百餘丈賊負土搶塞我軍死士分布爬城數次皆未得上申刻程學啟持令揮軍詐爲欲登賊以鎗密攢缺口我軍乘勢連開炸礮血肉雨飛賊仍更番死抗四鼓時程學啟督親兵於礮火中護搭浮橋兩道賊鑿穿城腳密伏巨礮攔河阻截徐佩璆乘飛划猝奪其礮十八日湖州黃逆陡率大股萬餘由新塍直撲我軍後路程學啟攻城正急分飭張家瑜張自全督師擊走之城上賊漸不支程學啟嚴催各軍懸梯登北門城悍賊湧至抵禦我軍傷亡枕藉程學啟憤極自督親兵躍過浮橋飛登當被洋鎗子打入左太陽偏後昏暈撲地劉士奇王永勝等急率隊以木筏分渡由西北角首先撲入吳毓芬陳忠德分爬東北兩門陳有昇龔生陽均受鎗傷創奮進其時適炸礮燒賊城中火藥房人聲鼎沸賊眾駭亂劉秉璋潘鼎新各率所部乘勢拔椿過濠爬入東

門甕城李朝斌亦抽水師登岸由南門踰牆而進榮逆猶率兩廣老賊數千人巷戰韓杰持令大呼各軍格殺劉士奇王永勝歐陽利見等擊斬五千餘級餘賊思由西門出遁經陳有昇梁安邦張家瑜與李朝斌水師攔擊各軍分頭截殺城內悍逆悉就擒誅偽挺王劉得功上城抵禦爲礮轟斃偽榮王廖發受逃匿該偽府井中搜山訊明梟首示眾遂於十八日申刻克復嘉興府城二十一日劉士奇王永勝李朝斌等復將黃老虎援逆屯踞新塍四亭子一帶賊卡賊壘踏平該逆全數遁回湖州臣查嘉興府爲東南財賦最重之區城堅池深糧多賊悍自咸豐十年陷踞後提督張玉良圍攻數月兵勇數萬被賊衝潰其形勢險固殊屬易守難攻此次榮逆等窮無復之舉眾死守又恃有湖逆黃老虎外援使我軍腹背受敵程學啟自埭平東北門外堅壘多座一面分紉援賊一

面架礮急攻將死必克始得速下名城盡殲悍黨實足伸

天討而快人心從此蘇滬之防漸固而杭逆糧路已絕羽翼益孤
自難久踞我軍越境苦戰傷亡精銳損折將領於大局似有裨助
遇缺提奏提督江西南贛鎮總兵程學啟出奇制勝忠勇謀略突
過尋常遇缺提奏侍講翰林院編修劉秉璋身先士卒堅忍耐苦
該二員臣未敢擅擬應請

旨優加獎勵著江南提督浙江處州鎮總兵李朝斌篤誠勇敢調
度得宜按察使銜常鎮通海道潘鼎新收復數城謀勇兼裕均擬

請

旨交部從優議敘至尤爲出力並死事各將士臣謹另繕清單籲

請

恩施其餘在事出力及陣亡員弁兵勇可否容臣登明彙核分別

奏請

獎卹所有官軍攻克嘉興府城擒斬首逆盡殲餘匪詳細情形理合恭摺由驛馳陳伏乞

皇太后

皇上聖鑒訓示謹

奏

洋藥票稅毋庸再徵片

同治三年二月二十八日

再上年十二月內承准總理衙門會同戶部議覆福建省舉辦洋藥票稅令照廣東成案每洋藥百斤改徵銀十五兩隨徵紋銀一兩其繳過票稅後所有釐捐等項仍照舊章辦理此外江蘇浙江湖北江西各通商省分遇有華商販運洋藥者並令酌量地方情形仿照辦理等因當經分別咨行酌辦去後茲據江蘇藩司劉卞膏捐釐總局暨蘇省糧道薛書堂代理海關道應寶時稟稱奉經疊次會商並督飭洋藥局員董籌議僉謂總理衙門原奏洋藥繳過票稅後釐捐等項仍照舊章辦理是於舊捐之外復加票稅滬上洋藥每百斤向收釐捐銀二十兩會防捐銀五兩此外尚有團練經費善舉津貼等項亦係隨捐帶繳均屬進口後華商捐繳之款其有販運出口者每百斤徵出口稅銀三十兩並先於進口時

徵進口稅銀三十兩統計稅捐兩項爲數甚多商力本形疲乏若每百斤再加票稅紋水銀十六兩則成本過重各商無利可圖勢必繞越各口或勾串洋人代提私賣偷漏稅捐關局兩處收數更細深慮得不償失體察情形實有難以增辦之勢惟票稅之議創自稅務總司赫德隨又與赫德面商據云從前創議辦理洋藥票稅係屬不收捐款今上海各捐較之票稅所定十五兩之數幾加一倍何能再加票稅等情前來臣查蘇省自軍興以來正賦蠲緩居多全賴捐釐濟餉苟有可籌靡不盡心設法緣票稅一事自總理衙門於咸豐十一年五月內奏奉諭旨飭辦後卽據前管關道吳煦核覆毋庸更議以免饒古詳報前大臣辭煥有案上海洋藥一項已有層層捐稅與閩省現辦情形不同既據該司道同總稅務司赫德等再四籌商難以急切舉

辦自係實情應請毋庸再徵俟將來別有可籌之方另行督飭辦理除分咨總理衙門戶部查照外理合附片陳明伏乞
聖鑒謹
奏

近日軍情片

同治三年二月二十八日

再據探報杭州府城亦於二月二十三日經浙軍攻克所有石門縣及湖州踞賊必已膽寒浙師自應乘勝攻取臣暫令劉秉璋留守嘉興潘鼎新分守海鹽乍浦平湖各城俟浙軍克復石門分兵替防臣即可併力勦辦蘇境之賊前由常州丹陽竄擾江陰常熟股匪經郭松林鄭國魁楊鼎勳張樹聲等四面兜勦歸路已斷惟賊眾尙有三萬屯踞楊厠周莊華市沙山一帶屢欲奪路衝突均被張樹聲攔頭擊回困獸猶鬪必須添調勁旅合力兜截以期早就殲除程學啟受傷極重前數日火毒攻心幾至不起幸連服寒涼峻劑稍有轉機所部各營現飭提督劉士奇總兵王永勝暫爲代統挑派精銳隊伍馳赴西路會同郭松林鄭國魁等攻勦楊厠匪俟將此股擊退再乘勝會攻常州戈登前由溧陽進攻金

壇炸礮轟破城垣賊死守未得爬入戈登腿受鎗傷聞尙不重
旋卽撤隊移勦楊軍之賊二十四日小挫據來函仍回溧陽養傷
臣已婉言慰勞諭令休息旬日徐圖協勦所有近日軍情附片縷
陳伏乞

聖鑒訓示謹
奏

沿江腹地肅清摺

同治三年三月初九日

奏為督飭各軍四面兜剿將楊厘一帶竄賊數萬殲除殆盡沿江腹地肅清恭摺仰祈

聖鑒事竊前由常州丹陽竄擾江陰常熟股匪經我軍力戰解圍該逆仍屯踞江陰東南歸路已斷添兵援剿各情臣於二月二十八等日兩次奏報在案三月初一日恭奉二月十九日寄諭富明阿奏忠逆之子及偽潮王等率眾五六萬從江陰南門外花山直奔楊厘常熟等處賊蹤飄忽該撫務當督飭痛加剿洗肅殄賊氛毋令蔓延為患等因欽此仰蒙

訓示周詳曷勝感悚當賊之初竄腹地也號稱十數萬偽王十數股冒雨急馳聲言攻犯常熟蘇錫各城以冀我北撤常州之關南緩嘉興之攻蘇滬及沿江上下謠言煽起賊勢甚張臣坐鎮省垣

督率員弁嚴查奸探速調各營協守無錫常熟各城以固根本日
夜馳書程學啟猛攻嘉興諭令李鶴章劉銘傳等攻常州之師勿
稍撤退但暗抽隊伍堵紮賊之去路俟我軍調齊合力剿洗此賊
飢窮內犯料其必敗迨黃翼升李鶴章郭松林鄭國魁等赴援神
速將常熟無錫江陰三城之圍次第解救賊數雖眾屯踞楊厠華
市周莊沙山五六十里開而面有我軍屯紮常州丹陽踞逆屢次
率眾由江陰青山等處衝入接應均被張樹聲劉盛藻等設伏剿
回使內外不得通聯子藥無從接濟賊技日漸危蹙但各路兵力
守皆有餘戰則不足二月二十四日戈登忽派鎗隊八百人衝入
賊巢幾致全軍沒覆幸嘉興已克臣卽添調劉士奇王永勝帶行
隊三千人會合郭松林循福山鹿苑江岸偪勦臣於三月初二日
由蘇州馳赴長涇親督各軍奮力會戰初五日各軍到齊臣審察

賊蹤自楊厓南至周莊華市夾山爲營縣互不絕楊厓城小而完
攻之不可猝克須先擊其腰臂則首尾不能相顧連夜布告各將
領分路進搗華市初六日黎明劉士奇王永勝郭松林由北路進
臣同黃翼升李鶴章李昭慶鄭國魁王東華由南路進已刻均抵
沙山腳距華市三里賊眾列隊山阿倚營拒敵劉士奇王永勝帶
隊抄入營後鎗礮環施賊陣稍亂鄭國魁李昭慶乘勢督隊撲營
拔椿踰濠一擁而進賊潰出營死力衝撲劉士奇王永勝鏖戰數
合賊大敗走緣山亂竄如蟻旋磨臣飛督各軍分道猛追過山四
十餘里賊屍狼藉溝壑皆滿自華市至樹山賊壘賊卡百餘處以
次掃平日已嚮晦人疲馬乏遂令李鶴章郭松林李昭慶繞至江
陰會合駱國忠張樹聲等由北路攔頭截勦劉士奇王永勝帶隊
暫駐周莊邀擊楊厓竄路臣督鄭國魁黃中元張志邦王東華各

營馳往青陽會合楊鼎勳等山南路從後兜剿是夜五鼓楊厚踞賊惶遽南竄欲併歸雲亭一路劉士奇等設伏於雞龍山下太平橋賊整隊來衝我軍鎗箭迭施逆駭而奔乘機蹙之落水死者無數先是初四日夜僞英王叔及忠逆之子兩股悍逆因東路援軍大至率眾由華市花山馳回三河口乘夜搭造浮橋三道憑河築壘以護初五日張樹聲劉盛藻出小隊誘敵逆眾二三萬由秦望山包裹而上勢極兇猛張樹聲等力戰卻之撿斬六百餘名是夜又在三河口添搭浮橋三道初六日華市周莊楊厚敗賊併聚雲亭花山一帶北抵南關南至越城橋均欲過三河口浮橋回竄丹常李鶴章夜抵江陰飛令郭松林駱國忠張樹聲等詰朝分路會剿初七日辰刻郭松林李昭慶列陣南關前面駱國忠由花山抄擊該逆見我軍堵住歸路拚死來撲黃兆來李正珮張紹棠戰數

十合將賊衝作兩段前隊萬餘人向越城橋西奔後隊二萬餘人由花山南奔郭松林躍馬橫出直撲三河口賊營賊卽棄鼓渡河浮橋五道擠斷其四人馬落水中堆積數丈河爲不流又將賊股截作數段楊鼎勳黃中元周壽昌等復由蕭岐花山尾攔住前後夾擊其未過河之賊或陷入圩中或棄械乞降敗以萬計其已過河之賊張樹聲屠殿魁周盛傳劉盛脩黃桂蘭等分趕截殺橫屍遍野澗水皆赤內有賊騎百餘匹帶眾數千急促迷路悉數擒之又一大股折回東竄剛合後隊黃桂蘭等衝爲數截過橋不及大半溺斃餘眾落荒星散日晡收隊統計各軍俘獲近二萬人牛馬千餘隻鎗械數萬淹斃殺斃沿途數十里不可勝計其奪路逸回常州丹陽者約僅二三千訊據擒賊供稱僞王侯及大頭目解得脫者此初六七日各軍四面兜剿殲除殆盡之實在情形也查此

股逆眾自二月初五六口內竄一月以來臣與各將領晝夜經營張網四面以冀盡數殄滅免致飽掠颺去復爲常州金陵外援之患茲幸仰託

皇上威福諸軍畢集兩日痛勦擒解散實有二三萬眾我軍傷亡不過百數十人緣歸路先斷子藥俱盡該逆遂不耐戰至初七下午衝散後大半徒手受縛所掠百姓米糧衣物概行拋棄仍散給窮民現在沿江腹地一律肅清無虞北竄所有守城殺賊尤爲出力之員弁擬請從優獎勵三品頂戴前保江蘇遇缺簡用道張樹聲已奉

俞旨昨准部駁另核請獎此次由常州城下分帶一千七百人堵紮要口敗處斷賊歸路擒斬踰萬勞苦功多該員由廩生從軍文武兼資識力俱定可否請

旨特予簡擢提督銜記名總兵楊鼎勳可否請

旨儘先簡放總兵實缺總兵銜署京口協副將駱國忠可否以總兵

記名簡放並給正二品

封典記名總兵李正珮可否

賞給從一品封典參將賈宏材歐載揚可否均以副將儘先補用

湖南補用副將周河清參將向順福易華元可否均

賞給勇號四川補用都司覃洪陞可否免補游擊以參將仍留原

省補用參將銜儘先游擊管松林可否以參將補用並加副將銜

游擊銜黃兆來可否以游擊儘先補用並加副將銜五品花翎千

總鄭國謨可否以守備補用並加游擊銜安徽補用知府魏承樾

可否免補本班以道員仍留原省補用五品頂戴候選從九朱開

奏可否免選本班以縣丞儘先選用並

賞戴花翎其餘出力及傷亡員弁兵勇查明彙案獎卹出自

逾格恩慈所有督飭各軍四面兜剿楊厝一帶竄賊殲除殆盡沿

江腹地肅清各緣由繕摺馳陳伏乞

皇太后

皇上聖鑒訓示再臣於拜摺後卽馳往常州督飭攻剿合併陳明

謹

奏

常州合圍摺

同治三年三月二十一日

奏爲督飭各軍連日猛戰踏平常州西門外賊營數十座官兵四面合圍設法轟打恭摺奏祈

聖鑒事竊臣於初六七日親督將士兜剿江陰東南竄賊殲除殆

盡旋由青陽赴常州督籌攻剿於初九日專摺馳陳在案初十日

行抵常州北門劉銘傳營十一日繞至東門李鶴章營十二三等

日陰雨與劉銘傳李鶴章郭松林楊鼎勳周盛波張樹聲等籌議

須合力攻破西門外賊壘嚴斷竄路以寒其膽十四日雨霽臣徧

察城西賊營橫亘二十餘里分爲兩路一當西北通丹陽一當西

南通金壇中夾運河左右環紮形如列星訊據逃賊供稱踞逆僞

護王陳坤書所部人數十餘萬蘇錫宜溧敗賊併歸常州又添數

萬去年大兵到常時招降三江脅眾萬餘人陸續接仗殺斃無算

此次合夥內竄江陰逃回者不過千餘現城內外眾尙十萬惟廣東西悍黨尤多因溧陽路斷丹陽金壇又有官兵圍攻無路可竄城中糧食尙支四五月護逆決志死守待援等語臣飭劉銘傳由北門先攻西北遠處賊營東南門出隊牽制是日巳刻劉銘傳派黃桂蘭劉盛藻在下茶庵賊營附近各築一壘卽率隊攻破賊營一座乘勢進攻新開三營用十二磅炸礮轟坍營牆數丈賊不少動劉銘傳親督將士大呼齊進從鎗礮雨中拔楸踰濠攀緣而入悍賊仍用鎗矛抵抗傷亡弁勇百餘劉銘傳憤甚立將踞賊七百餘人圍殺淨盡護逆率眾渡河分路來援將過浮橋賊壘已破黃翼升劉銘傳揮軍迎擊逆卽回走乘其半渡擠之落水死者千餘人南岸頭營二座亦卽潰退十五日臣添調郭松林楊鼎勳全隊由賊壘掘移向西南信第十六日濠壘粗就十七日先令王東

華帶水師三營由渴湖萬年橋進擊郭松林楊鼎勳合攻陳渡橋大石壘臣復調程學啟所練礮隊以小開花礮協攻自辰至午壘賊血肉濺飛死力堅拒楊鼎勳挺身爬牆被洋鎗子橫穿胸脊登時墜馬猶揮令將士奮呼殺入郭松林帶隊填濠而進令易用剛繞堵賊壘後門賊屢衝不出悉數擒斬之迤南三營相繼潰走郭松林督軍追殺連踏賊壘六七座鄭國魁築營新開賊隔河相拒劉銘傳分搭浮橋過河猛追賊不能支王東華礮船由三河口衝出軍勢正合臣與李鶴章飛調周盛波楊鼎勳張樹聲併力折向西北與劉銘傳前後夾擊賊眾緣河狂奔路狹人多自相蹂踐死者甚眾王萬釗曾明魁以鎗隊排擊斃賊無數有廣賊數千回戈迎戰郭松林李長樂各隊縱橫衝殺擊斃淹斃二千餘人又踏平沿河賊營二十餘座鄭國魁張桂芳卽填紮河北高壘三座郭松

林楊鼎勦填紮河南堅壘五座於是丹陽金壇兩路俱斷只西門根尙有賊營橫排六座緊護城身小南門根尙有賊石壘一座土營兩座十八日張樹聲周盛波合攻小南門營劉銘傳郭松林合攻西門營羅榮光同洋弁備雷連以炸礮轟倒小南門橋上石卡周盛傳乘勢攻奪土營賊卽潰走石營之賊亦潰各軍撿斬多名降二百餘人張樹聲復督隊向西門追擊賊方據高阜拒戰張樹珊劉克仁王得勝等直闖而入繞出賊後賊遽駭奔張樹聲乘機攻奪一營斃悍賊數百郭松林由西路夾攻劉銘傳鄭國魁由西北夾勦復踏毀靠城賊營三座其西南城角兩營亦卽潰退時護逆在西門城頭見各營不守立將城門堵塞營中潰賊多係兩廣悍眾盡向城腳亂走各軍三面擠殺填屍盈河所有城外賊營數十座一律掃平我軍分駐屯長圍已合戈登魁受鎗傷現就痊

愈屢請帶隊協勦常州臣准令前來適於十八日趕到西門正我軍合力攻營之候亦以炸礮助此十四至十八等日督飭各軍次第踏毀常州西南門外賊營四面合圍之實在情形也臣查蘇省賊眾屢敗併聚於金陵常州兩城拚死鏖險互爲犄角若縱其他竄必貽鄰省無窮之憂從前攻常兵力尙單未敢遽圖合圍茲因嘉興克復湖州之賊全數上竄蘇省東南防務稍鬆自應併力常郡速合長圍嚴斷竄路再行設法轟城臣飛調劉士奇王永勝帶五營行隊用程學啟攻嘉興巨礮與戈登開花大礮分攻正南門小南門令劉銘傳炸礮隊攻北門郭松林攻西門張樹聲搏攻東門約期並舉惟常城係各路敗賊精銳所集與臣軍搏戰最久稔知炸礮可以攻堅而爬城隊伍可以死拒前此奧倫攻太倉戈登攻金壇程學啟初次攻嘉興雖轟破城垣竟未得入轉多傷亡況

常賊約有十萬內除老弱數萬其兩廣悍眾積年死黨一旦窮蹙無歸勢必拚死拒守爲萬死一生之計臣惟設法招撫一面開礮轟擊脅以兵威仍離其眾心相機妥慎籌辦戈登近日頗順情理謂城內兩廣人必須盡殺其脅從願降可貸一死與臣意見相符城卽攻破當不致因此饒舌設蠱圯城垣仍爬不進惟有圍困數月待其糧盡自斃另抽游擊之師專勦援賊臣斷不敢求速效而誤大局除查明傷亡將弁另案請卹外所有督飭各軍連日猛戰踏平常州西門賊壘數十座官兵四面合圍設法轟打各緣由謹繕摺馳陳伏乞

皇太后

皇上聖鑒訓示謹

奏

程學啟請卹摺

同治三年三月二十一日

奏爲統兵大員因傷出缺恭摺奏

聞仰祈

聖鑒事竊照遇缺提奏提督南贛鎮總兵世襲雲騎尉勅勇巴圖魯程學啟猛攻嘉興府城鎗子貫入頭腦既絕復甦擡回醫治漸有轉機經臣疊次奏明在案程學啟自知傷重不肯服藥臣再三慰勸並延請內外科醫士進藥數劑言語神氣稍爲清楚臣初二日出省赴楊厚督勦復往看視程學啟言賊雖潰敗勢尙悍眾請飭諸將慎重兜擊又言人才難得恨將死不能爲

國家驅除殘寇輒哽咽流涕向臣太息臣猶勉以安心調治不必焦急並屬地方官時往照料追臣由江陰境內追賊至青陽忽接省信以程學啟日漸危篤頭左偏傷處成洞時有髓流火毒貫喉

六日滴水不入惟神志尙清初九日屬家丁爲穿

御賞黃馬褂望

闕叩頭旋繞室行走數步見案上有茶舉杯至口不能下咽淒然
淚下並令其營務處知州韓杰馳赴臣處屬專心勦賊不及等候
回省語不及私臨絕時大呼心事未了

聖恩未報腦漿迸流常於初十日子刻出缺臬司郭柏蔭督同府
縣親視含殮料理後事并據稟報前來臣適行抵常州接信之餘
不勝悲悼各營將士慟哭失聲江浙遠近官紳士民無不同聲呼
愴伏查程學啟籍隸安徽桐城遭亂被擄英逆四眼狗欲重用之
程學啟以該逆荼毒百姓營自逃去爲賊追回拘繫不得脫咸豐
十一年四月間今浙江撫臣曾國荃督軍進逼安慶程學啟密赴
曾貞幹營中納款曾國荃兄弟見其志趣忠勇迥異尋常降將遂

留營帶隊攻勦旋克復安慶省城程學啟之功居多經營臣曾國藩等奏報在案其時臣在安慶熟聞程學啟智勇可任適奉命赴滬倉卒召募幾不能軍請帶程學啟所部兩營東來曾國藩曾國荃念臣孤行危地無以自立慨然允在同治元年三月臣與程學啟等至滬五月虹橋之捷八月北新涇之捷十月四江口之捷皆殺賊近萬大挫兇鋒實賴程學啟多謀善戰以少擊眾威名自此大振臣因爲程學啟陸續增募至萬餘人部勒嚴整所向克捷先後克復青浦嘉定太倉鎮洋崑山新陽吳江震澤各州縣二年七月進佔蘇州蘇州爲羣賊淵藪城大糧多非四萬人不能合圍程學啟以水陸一萬人由婁門外跨塘逐漸進勦苦心經營將城東之寶帶橋五龍橋城北之蠡口黃埭城西之許關虎邱各處石卡賊壘次第掃平分兵布紮又兩次分隊遠勦嘉興援賊於八

圻平望一帶又助勦忠逆大股援賊於大橋角望亭一帶又分勦
湖州援賊於太湖東山一帶距老營皆六七十里出奇入險賊中
怖爲神兵臣於奏報蘇州克復摺內謂程學啟用兵如神每動一
著卽制賊命蓋紀實也十月間收復蘇城降酋邵雲官等九人謀
踞半城擁眾近二十萬意圖脅制戈登煦煦婦人之仁脅令收撫
稍一孺忍變生肘腋程學啟謂曾在賊中熟知情僞此輩罪孽重
大殺數頭目卽可解散餘眾保全實多臣故毅然誅其酋散其黨
蘇城大局頃刻卽定戈登雖偶反覆久之公論自明羣疑遂釋其
能謀能斷亦近時武將所罕見自西洋各國稱強海上兵法固甚
雄整尤恃洋鎗炸礮爲攻戰利器程學啟隨臣入滬留心講求每
與臣言外夷輕視中國必須練兵自強取彼之長去吾之短該部
操習洋鎗數千枝整齊變化已與洋兵相埒前攻蘇城每受戈登

之何乃發憤學習炸礮陰結洋弁之精於礮事者與之晝夜研究礮具及木心藥性準頭用法往往自出新意去冬克平望堅城今春肅嘉興名郡臣豫購覓三十二磅六十八磅大洋礮三尊交給演放竟能指揮如意功效優著不獨賊畏之如虎卽上海各國酋長洋商莫不震懼其爲人戈登初相猜忌聞其死也流涕歎惜目爲中國好將向臣索該提督打仗時隨身長旗二件將來攜回本國以爲紀念程學啟深心遠略謀勇精勤爲中外所共知設使天假之年功業詎止於此正月間曾國藩商調該軍赴金陵協攻程學啟以進兵嘉興勢難撤回惟以身受曾國荃前拔之恩耿耿圖報與臣約俟嘉興常州克復當帶礮隊赴金陵隨攻殲此老巢以酬知遇若程學啟不卽喪亡有益於疆場者甚大今年甫三十五歲遽因攻克嘉興隕身鋒鏑每念時事多艱將才不易臣誠私心

痛之程學啟無子以嫡姪建勳爲後年尙幼小惟其攻克安慶後
兩年之間又連復江浙名城十數處並克復蘇州省城似爲東南
第一戰功茲爲

國捐軀可否仰乞

天恩准照提督陣亡例從優賜卹

特旨予諡宣付國史館立傳並於安慶蘇州嘉興各府建立專祠
以彰忠藎出自逾格

鴻施再正繕摺聞欽奉三月初九日

恩旨以嘉興克復

賞給程學啟白玉翎管一枝白玉搬指一箇玉柄小刀一把荷包
一對卽敬謹派弁齎送蘇州交程學啟家屬祇領祭告以慰忠
魂合併聲明所有遇缺提奏提督南鎮總兵因傷出缺緣由謹

會同協辦大學士兩江督臣曾國藩具奏伏祈

皇太后

皇上聖鑒訓示謹

奏

溧陽官軍截勦金壇竄逆獲勝摺

同治三年三月二十九日

奏爲溧陽官軍截勦金壇竄逆獲勝擒斬僞酋多名殲除大股恭摺仰祈

聖鑒事竊溧陽縣城克復後其駐守之常勝軍戈登調往協勦江陰常州一帶臣卽飛飭前駐嘉興道員吳毓芬率所部水陸五營馳往替守三月十九日金壇踞逆爲鮑超之軍偪勦窮蹙棄城出竄二十日吳毓芬探知逆眾已抵南渡距溧陽三十六里恐其窺伺溧城卽帶隊三百名前往察看逆眾約二三千人屯列南渡東北小山大股則自山下行走吳毓芬伏兵山後令武和勝沈得勝率數十人馳誘之賊以五六百人來撲吳毓芬伺近揮伏兩路衝出鎗礮齊發斃賊數十賊卽退走是夜復探知賊在南渡西南二十里之小蜀山丁上橋周城鎮等處打館五鼓時吳毓芬帶隊

前往二十一日黎明至離城三十里之烏鴉嶺遙望丁上橋西尙有賊旗整隊馳勦擒斬數十名追過周城鎮二十五日探知僞直王率眾約會常州西路孟河呂城各賊由金壇境內竄往廣德已至南渡佔住侍逆舊營三座並分屯山下各村首尾十餘里約有萬餘人吳毓芬出賊不意自率陳占榜余嘉鼐出南渡正路吳毓蘭率杜長生由山腹小路出南渡東南扼招仙橋以截其前羅義勝帶礮船及炸礮隊繞出南渡之後銜枚疾走是夜二更齊至吳毓芬率陳占榜列隊山上令余嘉鼐率姜全政先圍村卡該逆疲乏睡熟悉數擒斬營賊驚覺與我山上之軍對擊適羅義勝礮船駛至排礮並發雜以炸彈賊棄營狂奔吳毓芬令羅義勝扼守南渡陳占榜武和勝沿山搜抄賊館自帶余嘉鼐追勦大股時黑夜無月賊未知虛實惟聞徧山號鼓鎗礮齊發驚竄蹂躪死亡枕藉

四鼓至招仙橋吳毓蘭列陣截擊賊沿河亂竄不成行列吳毓芬等由後掩殺逆眾覺水溺斃填河二十六日追及之丁上橋又追及之周城鎮四面兜裏棄械就戮已刻至建平交界已無賊蹤途中伏屍數十里陣斬僞直王林得英僞稭天安黃有才僞愚天福李六僞洞天福袁明勝僞一千四百六十九天豫龍有用僞武政軍司僞參軍司僞同檢等皆於屍身搜得僞印生擒廣西僞元勳一百二十五天將黃金龍訊係金田老賊僞護駕王黃金鳳之弟卽行梟斬計其斃賊四千人解散江浙被脅難民三四千人奪獲衣糧馬匹鎗械無數由吳毓芬詳細稟報前來臣查金壇業於二十一日經鮑超收復派兵駐守聞侍逆黨眾尙在廣德金壇敗賊與常州西路各逆窮無所之遂往投合南渡爲壇溧交界要路賊所必經溧陽城守僅二千人地險兵單正可危慮臣前接吳毓

芳飛稟卽令伺隙雕勦俾賊不測此次果能出奇制勝以少擊眾全股殲除勦辦甚爲奮勉其尤爲出力之游擊余嘉謚可否以參將補用並

賞加副將銜副將銜參將陳占榜可否

賞戴花翎都司羅義勝可否以游擊儘先補用並

賞加參將銜藍翎守備武和勝可否以都司儘先補用並

賞換花翎記保守備姜全政千總杜長生可否均以守備儘先補用並

賞戴藍翎其餘出力員弁兵勇容臣查明彙案請獎出自

逾格恩施所有溧陽官兵截勦金壇竄逆獲勝殲滅大股緣由理合由驛馳陳伏乞

皇太后

皇上聖鑒訓示謹
奏

常州近日軍情片

同治三年三月二十九日

再常州西南門外賊壘掃除後官軍四面合圍逆眾困守情形經臣於二十一日馳報在案是日臣即督飭劉士奇王永勝等將前攻嘉興大礮在小南門安設轟打戈登常勝軍礮位在大南門安設轟打劉銘傳礮隊在北門安設轟打夜以繼日至二十二日午刻各將城垣轟坍數十丈偽護王糾眾抵堵大南門缺口偽誌王糾眾抵堵小南門缺口偽天將費姓抵堵北門缺口皆挑奮勇洋鎗隊數千人拚死救護羣賊隨坍隨堵隨死隨上我軍屢次撲過城濠搶登均被城頭輒石鎗矛藥桶擊回將士傷亡頗多常勝軍外國弁勇亦傷亡十名城賊死者尤眾偽誌王經炸礮轟斃兩粵悍黨仍舍命拒守其兇狡實所罕見戈登與臣軍炸彈均已用罄天又陰雨暫行收隊休息一面飭催蘇州礮局趕製各項炸彈多

備攻具剋期再舉連日城內逃出脅眾供稱護逆因丹陽被困金
壇收復我軍四面密圍無路能逃是以堅志死守城內米糧可支
數月惟油鹽子藥久將缺乏等語臣查侍聽堵輔各逆眾現由湖
州廣德分路上竄江西常州護誌二逆與丹陽僞英王叔一股本
欲約會陸續併竄誠恐江楚完善之區又受擾害爲患更大臣一
至常州卽督各軍猛奮攻踏西南門賊營先斷竄路然後嚴密合
圍以冀設法勒滅該逆亡命困聚冒死格鬪固在意計之中臣惟
督飭各軍穩慎以圖設再轟打不進卽長圍困之多方誤之當有
聚殲之一日所幸附近各城俱已收復丹陽又有馮子材富明阿
派兵牽制僞英王叔眾雖三四萬屢敗之後終必竄走其勢似不
能援常卽使來援蘇軍合力聚於一城尙可以分撥迎剿臣前商
令黃翼升派淮揚水師周國興一營赴小河口查禁接濟昨據周

國興稟稱常丹交界之奔牛孟河圩塘魏村螺螄灣方仙橋沿江
一帶賊壘俱薙髮繳印乞降周國興收撫降眾一萬餘人分別遣
散並留守要隘丹陽來路已斷北竄更可無虞除續後攻勦若何
再行馳報外所有常州近日軍情理合附片縷陳伏乞
聖鑒訓示謹
奏

克復常州摺

同治三年四月初七日

奏爲督飭各軍四面圍攻克復常州府城生擒逆首僞護王陳坤
書餘眾全股撲滅恭摺馳陳仰祈

聖鑒事竊官軍合圍常州逆眾固守屢攻未下各情經臣於三月
二十一二十九等日馳報在案自二十二日轟塌城垣未得爬入
臣與諸將籌商日夜派隊嚴守缺口多方擾之適連旬陰雨該逆
每黑夜冒雨偷用土袋石灰包破船敝絮堵築坍塌處弁勇時以鎗
箭防護殪賊甚多戈登督帶炸礮細心看守初三日各項炸彈配
齊臣復添調劉士奇王永勝所部全隊赴常商定戈登礮隊仍攻
南門劉士奇王永勝等礮隊移攻東南角與戈登兩邊轟打一齊
爬城並以常勝軍前次傷亡過多難當頭敵派郭松林楊鼎勳所
部奮勇爬戈登所擊缺口而以常勝軍應之派劉士奇王永勝各

挑奮勇自爬所擊缺口而以道員張楨所剖應之又於城濠外預築長牆百數十丈使兵勇有所護身礮位可以移近部署既定臣與李鶴章輪替查勘飭郭松林劉士奇等各於長牆下開一深溝暗通城河可容二三千人夜間密派弁勇由溝內出搭浮橋屢被城頭守賊知覺自初更至天明鎗礮徹耳互有傷亡如是者三四夜而浮橋已搭成六道初五日雨稍止臣卽令戈登王永勝劉銘傳等開礮轟擊至初六日午刻戈登仍將南門舊缺口洗塌數十丈劉銘傳仍將北門舊缺口洗塌十餘丈劉士奇王永勝督同管帶礮隊都司劉玉龍洋人備雷將東南角亦轟塌十餘丈黃翼升督派各營水師分門對轟礮排發屋瓦皆飛城賊死力堵拒隨坍隨填經我軍礮鎗斃甚夥無處立足臣見機有可乘未正二刻傳令各軍同時大隊猛爬郭松林王永勝劉士奇各帶籐牌

噴筒分路突衝而上賊以火藥桶大石塊擲下燒傷多人其南門
缺口後隊稍斜郭松林橫刀亂砍一擁直前劉士奇王永勝催隊
愈急頃刻之間我軍旗幟布滿城頭戈登督帶常勝軍鎗隊連環
繼進忽護逆率兩廣悍逆數千拚死由小北門來撲王永勝劉士
奇由東門循城迎擊張樹聲乘勢督三營爬上東城會合兜剿戰
十數合逆漸不支而北門守賊仍與劉銘傳所部拚死拒鬪劉銘
傳率部奮猛撲進遂將護逆一大股擊入街心王永勝劉士奇劉
銘傳張樹聲節節追剿賊亦節節回撲沿衢塞巷屍血狼藉追至
偽護王府該逆仍率死黨紮立石卡以鎗礮對峙我軍圍之數重
殺傷適當副將龔生陽衝入賊隊生擒偽護王陳坤書游擊朱雲
龍生擒偽佐王黃和錦眾即奔潰殲戮靡遺郭松林劉士奇等覓
城內人眾不可勝誅傳令伏地棄械者免死於是男女老幼跪降

者六七萬有奇郭松林戈登周壽昌周蘭亭由南門循城追剿僞
列王賈天將帶奮勇七八千人由小南門蜂擁撲來又戰十數合
忽前忽卻周壽昌周河清等大呼陷陣周盛波帶三營由小南門
缺口爬進王東華張桂芳由西門爬進合力兜擊該逆前後受敵
猶亡命猛衝其總落城下數百人經周盛傳童邦喜截剿淨盡大
隊繞城亂走亦經各軍追殺內有廣東悍逆數百埋伏僻巷持矛
格鬪儘數斬之周盛波所部生擒費天將細送正法自未正登城
堞戰巷戰直至酉末始將賊眾全股擒殺無得脫者遂克復常州
府城臣訊據僞護王陳坤書俱稱廣西桂平人白隨洪秀全倡亂
竄擾湖南北江西安徽江蘇浙江數省向與四眼狗李秀成李世
賢等同事各有分地在諸僞王中年分最深今忠侍各逆棄土逃
竄我欲保守常州以爲金陵犄角奈事不成祇有盡忠各等語當

將該逆首凌遲處死梟示常州東門外以洩眾忿查該逆在賊中擁眾十數萬自忠侍兩逆敗後餘黨多歸常州精銳併聚一處上年十一月臣派李鶴章劉銘傳帶兵進攻大小數十戰解散降殺已數萬人二月間分股內竄經臣督軍勦殺又踰萬眾攻踏西南門各營擒殺逃散又數千人而城內精壯老弱尚不下十萬臣稔知該逆不甚耐戰但堅忍善守能得眾心若縱令他竄貽患無窮是以密速合圍冀圖殲此巨股前月二十二等日開礮猛攻城堞雖坍該逆負隅死拒各軍傷亡至一千餘人戈登及臣部將士無不憤怒切齒旬日以來多涉閒謀苦營濠塹懸立重賞廣備攻具該逆出萬死一生之計我軍亦爲背城一戰之舉如不速克恐生他變臣私衷實深惴懼仰蒙

皇上威福攻城之日久雨忽霽一鼓同登雖巷戰踰時傷亡將卒

又逾千人而悍逆全股撲滅實無漏網重貽他省之患江南大局漸定堪以仰慰

聖廑殊非愚臣初念所及除臣弟李鶴章無功可錄不敢仰邀

獎敘外所有尤爲出力之統將頭品頂戴遇缺提督劉銘傳在常州苦戰五月之久議定氣充屢卻大敵頭品頂戴記名提督福山鎮總兵郭松林記名提督王永勝儘先提奏提督劉士奇均首先登城不避矢石可否請

旨酌加優獎臣未敢擅擬遇缺提奏提督淮揚鎮總兵黃翼升勞苦功高可否請

旨交部從優議敘其勞績尤著之將佐文武另繕清單恭呈御覽伏候

核定以昭激勵其餘應獎應卹員弁兵勇容俟查明專案

奏辦所有督飭官軍四面圍攻克復常州府城生擒逆首全股撲滅各緣由繕摺馳陳仰乞

皇太后

皇上聖鑒訓示施行謹

奏

戈登加銜榮寵回國片

同治三年四月初七日

再權授江蘇總兵戈登帶隊協剿自前月二十二日轟破南門城垣未得爬入弁勇傷亡多人日夜與臣及李鶴章商籌布置挖濠築牆安礮搭橋虛衷和氣誓必合力殲除此寇其忠勇勤勞允堪嘉尚常州既克蘇省軍事稍定便欲辭退回國因常勝軍洋鎗隊近來老勇大半逃亡逐漸新募打仗不甚得力欲將鎗隊調回崑山妥爲遣散以節糜費暫留礮隊六百人並外國大小炸礮送交臣處派員接管其所用外國弁目陸續資遣志趣甚屬公正昨總稅務司赫德來常業與臣議有眉目除飭海關道趕緊籌借銀兩預備支用並派臣營務處委員直隸州知州丁日昌同戈登前往崑山會同李恆嵩等妥籌辦理俟辦結後再行縷陳外查戈登奮勇勤能立志爲中國助剿賊匪修立聲名自正月至今諸事俱受

商量謹遵臣處調度並與臣部將郭松林劉銘傳劉士奇王永勝楊鼎勳等和好無閒彼屬赫德與臣言在中國辦事祇求得一體面去年蒙

大皇帝賞銀一萬兩斷不敢領或勻給該營洋弁遣散經費等語此次協攻常州殊爲出力可否請

旨賞加提督銜並由臣訪製表功旗幟並外國金寶星式樣傳旨送給俾其回國後藉示榮寵附片具陳伏乞

聖鑒訓示謹
奏

進規丹陽援應溧壩片

同治三年四月初七日

再常州既復蘇境只丹陽金陵兩城未克丹陽現有馮子材聲明
阿各軍進攻西北兩門在馮子材來兩賊勢尙盛臣訊據護逆俱
稱僞英王叔展有密信屬令堅守常州互爲犄角茲常城克復全
股殲除丹陽已成孤注臣派令劉銘傳郭松林等督帶二十餘營
由奔牛北趨相機夾攻以期迅克昨准曾國藩咨稱聽侍各逆上
竄江西欲調鮑超全軍援江商令臣處酌派勁旅接防東壩查溧
陽至東壩一百數十里間爲金陵丹陽上竄廣德要路臣若以孤
軍進東壩一經竄逆中梗蘇州消息難通軍火餉米接濟立斷於
勢暫不甚便現令劉銘傳郭松林等進丹陽張樹聲六營守常州
劉士奇王永勝兩軍因嘉興常州苦戰傷亡弁勇至三四千人節
次移營疲勞殊甚且湖州未克蘇省空虛須令屯紮休養專備各

路游擊援應局勢方穩目前暫無大枝勁旅可以遠赴東壩擬令提督周盛波黃中元八營由溧陽進紮南渡以備截剿金丹等處竄賊與溧陽東壩較易聯絡俟丹陽克復北路防鬆卽派各軍進紮東壩二溧一帶以便替出鮑軍援剿江西除函商督臣外再臣自三月初二日出省督剿陰雨泥淖馳驅不息感冒風溼眠食頓減又行營倥傯本衙門日行文件各臺局餉釐要務相隔較遠無從經理久必廢擱俟常州防務布置粗定交李鶴章就近妥商調度仍卽回省籌辦一切兼就醫治理合附片具陳伏乞

聖鑒謹奏

丹陽克復派兵接守句容東壩摺

同治三年四月十一日

奏爲丹陽克復派兵接守句容東壩各要隘恭摺仰祈

聖鑒事竊常州攻克擬派劉銘傳郭松林等馳往丹陽會剿經臣
於四月初七日附片陳明是日先派副將黃金志帶馬隊百餘名
由奔牛呂城前進探聞丹賊僞英王叔等因常州已克全股被殲
驚懼殊甚劉銘傳郭松林冒雨帶隊遄行甫抵奔牛據探騎回報
初八夜丹賊內亂僞英王叔陳時永被殺餘賊開南門逃竄鎮揚
官軍入城收復等語是蘇境北路已清自應查照曾國藩咨商派
兵接守句容東壩以便鮑超迅速赴援江西當飭劉銘傳所部十
二營赴句容接防鄭國魁所部水陸五營赴東壩接防以固蘇省
門戶而扼金陵竄路金陵外援久絕枝葉全芟賊勢益窮不日當
可得手臣已將常州防務布置就緒拜摺後卽起程回蘇所有丹

陽克復派兵接守句容東壩各緣由繕摺馳陳伏乞

皇太后

皇上聖鑒訓示謹

奏

裁遣常勝軍摺

同治三年五月初二日

奏爲裁遣常勝軍連日辦理就緒各情形遵

旨覆陳仰祈

聖鑒事竊常州克復後定議裁撤常勝軍臣於四月初七日附片陳明當卽督飭丁日昌等妥速辦理旋奉四月十四日

寄諭戈登帶隊協勦現在常州攻克該洋人不言進攻金陵竟肯先行遣散免將來許多枝節實屬不可失之機會該撫自應乘勢利導妥爲遣散如戈登將所部布置妥協洋弁均皆回國則是戈登真心要好始終如一僅止頒給旗幟功牌不獨無以酬其勞且恐無以慰其欲卽著李鴻章飭令丁日昌李恆嵩等與戈登妥爲辦理一俟辦有就緒卽將如何再行嘉獎戈登之處迅速奏聞等因欽此仰見

聖慮周詳柔遠防患之至意茲據丁日昌回省面稟並據戈登李
恆嵩具稟於二十五日辦理遣散完竣等情前來謹爲我
皇上縷細陳之緣常勝軍起於美國人華爾其初不滿千人陸續
增至四千餘人糧餉軍火惟意所欲無從核減同治元年秋冬閒
調令助剿金陵不能成行遂致自齊文之變臣在上海與英提督
領事等反覆論議舌敝唇焦始得更定章程兵額裁至三千月餉
發至七萬餘元合之購辦軍火賞卹雜支各款每月須十萬元有
零戈登接帶後臣加意撫馭遇事尙受商量而性急多疑每有反
覆自今春金壇楊厚兩次挫衄戈登頗覺氣餒三月二十二日常
州之役城已轟破未能爬入戈登曰噤常勝軍之不能得力四月
初六日再舉攻城戈登卽請以我軍爲前敵常勝軍爲後隊蓋自
知不如我軍之用命也常城克復卽將洋鎗隊調回崑山派令丁

日昌前往會商撤遣戈登意甚欣悅乃臣於十五日接據巴夏禮
申陳以議裁常勝軍一事必須知會駐滬英官轉稟駐京公使查
核辦理並據赫德來函謂蘇省雖已肅清金陵湖州兩處賊竄可
虞引咸豐十年以前之事爲戒極言常勝軍不可遽裁譬喻百端
戈登似爲所動丁日昌等往復開導忽迎忽拒尙欲迎合巴赫二
人之議留礮隊六百名鎗隊一千餘名丁日昌復探其情謂之曰
爾在中國助剿功成回國中外傳名不及此時裁撤將來接帶者
儼如白齊文之類鬧出事端豈不爲爾聲名之累巴夏禮赫德係
局外人方以常勝軍爲十分可靠故不肯遽裁爾何不將此軍近
日不能得力實情自與訓諭免得自己聲名爲他人所累戈登深
以爲然卽於十七夜馳赴上海其時赫德已北上遂與巴夏禮再
三辯論巴夏禮始得釋然惟以上海要地請由臣酌派得力兵勇

駐守屬戈登轉達等情戈登回崑山述其語丁日昌恐洋人情性無常或又中變卽於談次請戈登將應答之語親書洋字一紙留存以免巴赫二人藉口並繕譯節略由戈登等函稟到臣閱其與巴酋問答之詞首言洋鎗隊兵頭多非正兵不諳兵法朝夕飲酒兵丁自去自來遇事便與官軍作對只知增添口糧不想作事因此數層不安故戈登立意相勸遣散次言巴夏禮是爲中國地方起見並非多事屬臣不必與之鬪氣等語臣先已備文劄復巴夏禮爲具言兩年戰事常勝軍會合官軍與官軍獨自分路攻剿之顛末與常勝軍近日底細所以議裁之故並告以現在辦法係酌留得力礮隊六百人鎗隊三百人海生輪船數十人已及原額三分之一並非全裁且前敵各要隘皆有重兵駐守上海後路無虞竄人以力破巴酋等藉詞要挾之端一而卽飭戈登李恆嵩丁日

昌迅速照辦飛催代理關道應寶時籌借銀兩交知府賈益謙齎往崑山節次據稟連日發餉收取號衣洋鎗挨次撤遣於二十五日遣散淨盡戈登以該軍兵勇向挾外國人以自重外國人一有挑唆兵勇卽靡然從之肆行無忌先將外國兵頭撤遣厚給川資限三日內出城違者嚴辦次卽遣散中國兵勇按路途之遠近年分之深淺打仗之受傷與否酌給盤費驅令出城不准逗留生事均已貼然就道查外國弁目一百零四名受傷頗多除月餉外按名酌給賞卹途費自七十五元以次遞增至四千元不等勇丁除月餉外其分領賞卹者其二千二百八十八名自兩元以次遞增至一百元不等又海生輪船礮船鎗船暨通事書識等分別給賞其用遣散經費洋十二萬二千八百元有零又補給月餉六萬元有零所有軍械洋鎗帳篷號衣船隻大小礮位全數呈繳驗收現

留礮隊六百名經臣委派副將羅榮光管帶調紮蘇城外之許關
留外國兵頭十一名幫同教習聽管帶官號令約束已與戈登議
明隨後如撤遣回國只加給一月口糧其鎗隊三百名暫留崑山
交李恆嵩督率巡防並留外國兵頭一名隨同彈壓以免各國流
氓冒充滋事各兵丁改穿中國號衣約計每月口糧其需一萬數
千兩仍由關道籌發此後逐漸訓練操縱由我自不致另生枝節
臣查常勝軍利器在礮火而洋弁貪恣兵勇驕悍銅習殊深久爲
蘇省隱患兩年以來每思乘機善遣徒以軍事方棘外人把持未
易就理現值蘇常肅清戈登辭退竟肯主持議撤雖巴夏禮赫德
從中阻撓戈登猶爲我出力多方排解十餘口開分別遣留糜費
固多而辦理甚速可免後來無窮之憂實屬真心要好始終如一
彼既不肯領收銀兩自願請

旨再行優獎聞戈登似欲邀

賞黃馬褂以爲歸國寵榮足見向慕中國之殷查戈登自上年春間會帶常勝軍協同官兵攻克福山解常熟之圍又克復太倉州崑山吳江各縣及蘇州省城本年克復宜興溧陽縣及擊退楊厚竄賊攻克常州府城均屬異常出力厥功甚偉可否

特旨頒賞黃馬褂出自

逾格鴻施再據上海來信巴夏禮以常勝軍既經裁遣欲另議教練良法仿照外國章程保守永久其意仍不過攬我兵權耗我財力臣擬添調數營駐守上海附近地方屬戈登先爲轉商應由臣處調度不便再在英官干預戈登似以爲然但不知巴夏禮與英提督伯郎有無異議除俟該酋等如何辨難再行相機妥辦外所有裁遣常勝軍部署就緒各緣由理合繕晰具奏並照鈔英領事

巴夏禮申陳及剗復該領事各一件又緡戈登與巴夏禮問答節略一件恭呈

御覽伏乞

皇太后

皇上聖鑒訓示施行謹

奏

分勦湖州進逼長興摺

同治三年五月十七日

奏爲官軍分勦湖州攻克吳淞殷濱村等處賊壘太湖水師攻克長興縣屬之夾浦口賊壘陸軍進逼長興縣城攻燬東門外賊卡恭摺仰祈

聖鑒事竊臣因湖州賊氛尙熾派道員潘鼎新各營由平望分紮南潯震澤以遏其衝別遣郭松林劉士奇王永勝楊鼎勳等營由宜興分路進攻長興並調李朝斌太湖水師由夾浦口會勦均於初二日馳陳在案嗣因潘鼎新各營分紮南潯震澤尙嫌單薄復令劉秉璋派聶桂榮等水陸五營往紮濱湖之吳淞互相聯絡詎初七八等日湖州踞賊僞立王黃文英僞樂王譚應芝僞襄王劉官方等糾眾數萬已竄踞吳淞擾及陸家灣軋村殷濱村丁公橋一帶橫互數十里初八日午刻賊圍陸家灣練勇營盤道員丁壽

昌派水師總哨康嘉賓率礮船由南潯往援自帶行隊繼進賊見我軍師船卽分悍逆千餘迎敵水師排礮連轟斃賊甚多該處練勇亦出助勦始行擊退救出難民數千申刻賊仍在丁公橋擄掠丁壽昌乘賊不備率劉思柱吳秉權各帶二成隊由兩河橋車駕橋包抄掩擊賊大驚潰生擒數十名殺斃淹斃無算是晚探知賊在殷濱村各處紮營丁壽昌夜半帶隊齊進奮勇截勦立將丁公橋天到橋賊卡攻燬生擒僞朝將吏得成初九日潘鼎新馳赴南潯適聶桂榮等五營亦至聞吳淞賊向東竄撲潘鼎新令丁壽昌等沿途迎勦過南貨港羣賊如蟻我軍分路兜殺斃賊數百追至殷濱村暴雨收隊哨長汪本立追賊死之另派唐宏成戴春林等山溪港小路進抵大廟港亦遇賊接仗各有斬擒是夜賊仍在殷濱村四處焚掠潘鼎新議分道猛攻初十日早令唐宏成韓照

揚率戴春林夏金標趙濟川王燮堂焦宗良等各五成隊由湖塘直趨吳淞聶桂榮率曹光澤王應海劉廣福等由丁公橋攻殷濱村而以丁壽昌劉思柱吳秉權繼之徐道奎聶桂林水師與爲依護吳淞之賊前阻一卡後築三壘沿塘泊礮船數十號民船數百號水陸鎗礮抵拒我軍頗有傷亡唐公成憤勵士卒爭先猛撲立破其卡於是唐公成率眾攻中壘韓照揚攻南壘都司何孝繼率勇躍濠突進刃賊無數生擒多名南壘賊罕脫者戴春林等偪濠擲火彈肉薄齊登中壘亦破東壘賊突門赴船夏金標等揮隊截勦躍奪其船墜入水者甚眾餘賊沿塘狂奔我軍追至喬渡斃賊千餘奪獲船隻器械無算聶桂榮等至殷濱村該處徧野桑陰賊匿林中西伏東出我軍步騎不得逞列隊村外誘之劉廣福王應海至天到橋口賊果傾巢出撲水師徐道奎聶桂林沿岸環攻聶

桂榮西光澤從中路迎擊劉廣福等扼橋力戰斃賊多名生擒龍衣賊目一名賊棄械狂竄我軍卽紮天到橋偵知廢瀆村後路尙有胡漣可通十一日向曉各營蓐食齊進水師抄天到橋橫截其前劉廣福等繞村分抄其後賊果出遁三面要擊斃賊無數當將殷瀆村二壘攻燬忽中塘輒村織里一帶援賊復至勢極洶湧排鎗擊之斃賊數百生擒黃衣賊目二名聶桂榮各營當在吳淞駐守敗賊均退喬漣以西此分踞湖州之軍連日戰勝情形也李朝斌太湖水師經臣商調於初九日自率六營由洞庭西山乘風抵長興縣屬之夾浦口該處踞賊於象公廟前後堅築大石壘二座安大礮數層正對湖口左右小河中間皆橋橋上築卡以護石壘防守周密探知有賊二千餘適值天雨李朝斌冒雨以洋鎗旱隊乘之左右各三營兩路分擊中路河窄令陳定國率舳舻排列大

礮轟其前壘賊亡命困鬪旱隊屢次搶登均被拒回李朝斌遂於
左右各抽一營隊伍斫取蘆葦填入小河渡抄後壘親自晁水躍
至舢板大呼齊進從鎗礮如雨中攀援礮眼而入總兵陳定國繼
進鎗子由眉心透腦後創重暈倒總兵江福山子傷左手筋骨俱
斷哨官黃弼臣王春華均受重傷仍兩路猛進賊不能支石卡齊
破乘勝飛過橋適填河二營亦衝過合圍賊無竄路仍以死拒
僞烈王江逆中矛刺斃前後兩壘一時齊破四面圍殺淨盡當將
後壘焚燬留前壘駐守初十日郭松林劉士奇楊鼎勳等陸軍亦
由宜興前至分紮施溪夾浦一帶王永勝所部開字全軍進紮湯
橋烏溪以防廣德四安援賊劉士奇留兩營駐夾浦口十一日郭
松林等軍拔赴長興遂將東門外上莘橋跨塘兩卡埽平偏紮城
下此進攻長興之軍戰勝情形也臣查浙軍現紮湖州塘南此次

踞逆大股出撲獲賊訊供意圖直犯南潯震澤莫禦游軍後路並
擾蘇防經我軍攻燬其巢兇鋒已挫惟楊渢大錢口等處踞逆尙
多與吳淞毗連時出肆擾沿湖尙無水師依倚臣已飛咨李朝斌
酌撥二營前往兩而兼顧仍飭潘鼎新穩紮穩進長興踞賊旣失
夾浦要口其氣已奪現今郭松林等合力猛攻速克此城則湖逆
竄路將斷或可以次得手所有官軍分勦湖州攻克吳淞殷濱村
賊壘及太湖水師攻克長興縣屬之夾浦口陸軍偪紮城下各緣
由理合恭摺馳陳伏乞

皇太后

皇上聖鑒訓示謹

奏

請俟湖州克復再協攻金陵片

同治三年五月十七日

再臣欽奉五月初八日

寄諭李鴻章所部兵勇攻城奪隘所向有功礮隊尤爲得力現在金陵功在垂成髮捻蓄意東趨遲恐掣動全局李鴻章豈能坐視著卽迅調勁旅數千及得力礮隊前赴金陵會合曾國荃圍師相機進取速奏膚公李鴻章如能親督各軍與曾國荃會商機宜勦辦更易得手著該撫酌度情形一面奏聞一面迅速辦理等因欽此仰見

聖謨廣遠

訓示周詳曷勝欽悚臣於攻克常州後未敢遽議協勦金陵一以臣部兵將苦戰經年傷病疲乏未得休養若遽令遠出誠恐再衰三竭無裨大局一以曾國荃全軍兩年圍攻一簣未竟屢接來書

謂金陵所少者不在兵而在餉現開地道十餘處約有數處五六
月間可成如能及早轟開自必無須協助又疊准曾國藩咨緘屬
令派兵接防句容東壩溧水高淳各處又准左宗棠咨商撥兵進
規長興以掣湖州賊勢臣因湖州賊氛尙熾實爲蘇省切近之憂
應先派勁旅進規長興協取湖郡俟湖州克復門戶穩固然後分
兵會剿金陵方無後顧之慮是以揀派郭松林劉士奇王永勝楊
鼎勳等軍會攻長興現已進逼城根勢難遽行撤動而蘇常新復
各郡縣內防湖州竄匪外堵金陵竄路節節設守未可一處空虛
常勝軍裁遣後英酋巴夏禮等方以松滬腹地無備日與饒舌臣
固未可遠離臣之兵力亦僅勉支堵剿至臣部礮隊向稱得力者
一則常勝軍礮隊向係洋弁二三十人領帶專管安設施放各事
昨經戈登分別撤遣仍留得力洋弁十餘人巴夏禮謂奉英君主

之論不在再令出隊打仗臣未便相強頃始派員接管須操練三五箇月漸求精熟方可派出攻剿一則提督程學啟所遺礮隊內有大礮三尊可以攻城有英人備雷幫同教習現爲王永勝劉士奇帶往長興一則提督劉銘傳礮隊內有法國人改隸中國之總兵畢乃爾幫同操習然大礮少而小礮多可以攻營劫寨而專攻一城尙不敷用前攻常州時臣調齊三軍礮隊分門合攻月餘乃下金陵城大而堅洪李各逆負固老巢非嘉興常州可比曾國荃地道如羅不開必須礮隊協助則臣處所有礮隊須全調前往合力猛攻且有得力礮隊亦須有得力鎗隊而與礮隊素習者相爲護持庶築牆爬城稍有把握忠逆現在金陵城內稔知炸礮虛實故非厚集礮力多選奮勇不能操券目前常勝軍所遺礮隊旣未練成程學啟所遺礮隊已往長興劉銘傳近在句容亦擬添配礮

位操練兩月再行攻剿除由臣督飭各軍趕緊操習一面多製炸彈廣儲攻具聽候調撥外擬請俟湖郡克復蘇防稍鬆再飭協攻金陵以求有濟仍隨時咨商曾國藩曾國荃酌度辦理所有遵旨覆陳各緣由伏乞
聖鑒訓示謹附片具
奏

克復長興摺

同治三年五月三十日

奏爲水陸官軍擊退湖州廣德拔賊乘勝猛攻克復浙江長興縣城恭摺仰祈

聖鑒事竊太湖水師攻克夾浦口陸師進逼長興經臣於十七日馳報在案十二日李朝斌帶水師進至城東北六里之後漾村十四日黎明出四營旱隊分伏山後先以十餘人誘賊賊果以二千餘人由北門小東門迎敵我軍伺近揮伏衝擊追至城根斃賊多名陸軍分門築壘郭松林所部偪紮東門楊鼎勳所部偪紮東南劉士奇所部偪紮北門均離城半里互相聯絡王永勝所部自夾浦口節節爲營援應後路楊鼎勳又派曾明魁分紮兩營於夾浦至長興適中之西莊橋搭設浮橋二道以通前後之氣踞逆僞襄王劉官方負隅不出十七十八等日湖州堵輔二逆令僞天將陳

逆率二萬人由東南來援自鴻橋至跨塘橋不斷直達城隅廣德
四安兩路賊首僞列王江逆僞堵二殿下亦率四五萬人由西北
來援依山築壘繇互山谷兩面賊勢俱甚洵湧與城賊相應郭松
林等會商分勦約王永勝一軍於二十二日黎明由夾浦繞至新
塘口以抄賊後郭松林楊鼎勳由五里橋擊湖州援賊正而背水
爲陣該逆奮拒我軍排放洋鎗屹立不動任其衝突俟賊氣衰一
呼齊進陳逆督眾死抗正在酣戰聞王永勝自新塘口馳至兩面
夾擊鎗斃斬獲數千人遂將鴻橋跨塘橋沿河傍山賊營一律踏
毀李朝斌水師登陸由磨盤山繞出賊背劉士奇亦由磨盤山直
逼廣德四安援賊各營江逆驅眾衝出搏戰多時李朝斌率所部
由山梁疾趨而下用火器擲燒賊營烟燄蔽天賊首尾莫顧劉士
奇分路抄殺斃賊及溺水死者萬人枕藉谿壑西北面沿山賊壘

亦均踏平二十三日正擬於西北兩門外搭浮橋攻城詎陳逆江
逆敗逃未遠堵輔各逆復由三路添撥大股折回再逼於是郭松
林楊鼎勳與淮揚水師三營馳擊湖州續至之賊劉士奇王永勝
與太湖水師馳擊廣德四安續至之賊俱乘其喘息未定合力痛
剿殲賊各數千人追殺二十餘里賊乃遁颺郭松林李朝斌等知
湖賊必爭長興勢猶不已遂定議猛攻派廖德旺張正全在西門
外王平西舒義志在北門外河內各搭浮橋三道限於是夜四鼓
成工城賊鎗礮噴筒並發弁勇傷亡頗多哨官王備興中礮殞命
張正全鎗傷左臂仍督工立就二十四日黎明游擊劉玉龍同洋
人備雷在城北安設炸礮靠城轟打劉士奇王永勝各派二營郭
松林派三營隨楊鼎勳攻北門郭松林自攻南門劉士奇與李朝
斌水師攻西門王永勝自攻東門淮揚水師及郭松林礮船攻東

南東北兩隅李朝斌復派一營於北門外河邊排大礮與備雷並
轟已刻已塌城牆十餘丈楊鼎勳督隊渡河鼓噪而登賊以鎗礮
排聚缺口並擲整桶火藥拚命抵拒哨官參將向大鵬鎗子貫腦
游擊周金才鎗子貫胸均登時陣亡總兵高占彪鎗傷右臂弁勇
亦傷亡數百名營官梁安邦于奇泮易用剛李長樂陳忠德葉廷
杓周蘭亭等身先士卒肉薄以登各營奮勇繼之李朝斌郭松林
劉士奇王永勝亦率所部三面緣梯齊上于奇泮鎗子入左眼鄧
明遠鎗傷右足王平西鎗傷左頸仍各裹傷力戰賊雖面面受敵
仍無退志郭松林率宋德鴻首先爬入哨官千總劉興隆繼之爲
搗木擊破額頗陣亡各軍一擁並登城內悍賊次第擒斬其由西
門衝出者李朝斌豫行設伏悉數殲之遂於二十四日午刻將長
興縣城克復臣查長興毗連蘇浙杭山帶湖屏蔽湖州與廣德四

安爲犄角是以堵輔各逆遁各股死力爭援城外重圍疊嶂桑田
陰翳港汊紛歧兵勢頗難展布相持過久他變必生幸水陸諸將
協力同心奮迅猛攻自克夾浦至於城下之日僅及半月神速赴
機殲賊殆盡各將士於炎天烈日中奮力爬城傷亡枕藉實屬勞
績卓著其尤爲出力之遇缺提奏提督楊鼎勳謀略素優前攻常
州胸背爲鎗子洞穿調治未愈移師奮往率隊先登可否仰懇
聖恩交軍機處存記遇有提督總兵缺出儘先簡放江南提督李
朝斌福山鎮總兵郭松林貴州古州鎮總兵劉士奇江西南贛鎮
總兵王永勝可否請

督旨均交部從優議敘提督銜遇缺提奏總兵陳忠德可否請以提

記名簡放記名總兵周蘭亭宋德鴻成俞卿可否均請

簡放總兵實缺記名總兵高占彪龔生陽葉廷杓可否均請
賞給二品封典補用副將李長樂舒義志可否均請免補副將以

總兵

記名簡放總兵銜儘先選用副將宋甸南可否請免補副將以總
兵遇缺先行提奏推補副將于奇泮副將銜儘先參將張正全可
否均請

賞給勇號儘先補用游擊劉玉龍可否請以參將補用並

賞加副將銜都司程祖旺可否請以游擊儘先補用並

賞給勇號陣亡之擬保副將銜儘先參將向大鵬擬保參將銜儘

先游擊周金才守備王福興擬保花翎千總劉興隆可否均請

旨敕部照陣亡例從優議卹其餘出力陣亡員弁容臣查明彙案

奏請

獎卹所有水陸官兵擊退援賊乘勝攻克長興縣城各緣由理合
由驛馳陳伏乞

皇太后

皇上聖鑒訓示謹
奏

鼎軍吳淞獲勝片

同治三年五月二十日

再湖州吳淞之賊前經我軍擊敗退至喬淞以東散布村落潛匿桑林中十三口潛鼎新派唐宏成等在胡淞站隊以備吳淞紮營午後該逆大股伺隙突犯唐宏成督戴春林等迎擊聶桂榮曹廣澤等從旁協助賊始潰退十四日我軍仍一面站隊一面紮營賊屢來撲均被擊走是晚唐宏成暫回大廟港賊偵我濠牆未固堵逆各大股西自喬淞胡淞南自殷濱村分路直撲王應海之護軍營洋鎗擡礮甚猛王應海出營迎擊小腹受傷折回賊從南面橫穿布滿街心悍賊登屋放鎗子落如雨王應海營濠未就致被衝破仍固護軍左營數重並犯聶桂榮營聶桂榮曹廣澤合力援剿水師徐道奎聶桂林礮船駛至湖濱連開大礮唐宏成趙濟川等半路回援立解左營之圍聶桂榮復令宋興元陳清泰周藍田盧

滿江等分隊包抄橫截賊隊賊乃大挫立將王應海原營奪回擒斬黃衣賊目多名當令趙濟川焦宗良派行隊守之賊退離吳淞三里紮營潘鼎新緣吳淞兵單復添調震澤吳江之夏金標潘鼎立二營並各營隊伍礮船分載炸礮前往會勦十五日分頭誘擊賊果出撲趙濟川焦宗良等督勇從桑林四面搶入斬敵數百水陸夾擊遂將胡淩西南賊壘數座一律踏毀羣賊驚竄聶桂榮唐宏成等追至喬淩斃賊尤多是日中塘織里之賊復竄南潯近村丁壽昌督劉思柱吳秉權等擊走之十六日丁壽昌復約水師徐道奎及韓照揚分道並進賊望風潰竄乘勢踏其新壘追過織里二十二日潘鼎新親越楊淩至大錢口察看賊勢回至錢淩會合太湖水師周正林李新燕將沿湖營賊轟散二十四日潘鼎新復以輪船炸礮水陸夾攻湖濱之賊悉遁歸中塘織里一帶與浙軍

何璋章各營日相纏擾臣查湖州逆眾蟻聚湖濱屢次圖犯南潯
吳淞爲分竄蘇浙之計常鎮道潘鼎新所部人數雖單屢戰獲勝
現已扼紮堅穩除飭會同李朝斌太湖水師相機防勦外連日陣
亡之擬保守備藍翎把總陳順昌擬保千總六品軍功汪得勝擬
保把總六品藍翎孫彪擬保把總六品軍功楊德元均請
旨敕部照例議卹所有分勦湖州近日軍情理合附片馳陳伏乞
聖鑒訓示謹
奏

籌畫湖州金陵緩急片

同治三年五月三十日

再前奉

諭旨飭調勁旅數千及得力礮隊赴金陵會攻當經臣以湖州未復礮隊未齊暫難分撥各緣由於十七日據甯履陳在案旋又疊奉五月十一十六十九等日

寄諭飭催臣撥兵會剿金陵或親往會攻毋稍避嫌推諉等因又疊准曾國藩曾國荃咨函遵

旨催令臣酌帶勁旅萬餘人並開花礮隊親赴金陵會商攻剿臣查金陵關繫東南數省大局如能迅速攻拔江鄂賊勢可漸瓦解況在江蘇本境臣義所應爲敢存畛域之見臣在曾國藩營中從事多年與曾國荃素相投契現又諄切商催更無嫌怨之可避臣聞

命以來復接曾國濟等咨緘心急如焚恨不能剋期就道惟湖州賊股甚眾附城數十里內面面賊壘堵逆黃文金輔逆楊輔清等均係百戰悍賊浙師似難獨力制之且浙軍僅能扼東南兩面其西北瀕臨蘇常中隔一湖湖面極寬處處接壤浙師勢難兼顧現因湖城未復東自吳江平望西至宜興溧陽數百里間均須分守牽掣許多兵力長興攻克足扼湖州之吭若郭松林各軍乘勝進趨與潘鼎新吳淞南潯各營李朝斌太湖水師各營分路並進或可漸冀得手又不知東南浙軍能否齊進如卽調攻金陵臣軍大半分守各城惟郭松林劉士奇王永勝楊鼎勳等爲游擊之師其鎗隊最爲得力自須調往又恐湖賊乘閒內竄若欲臣會攻金陵復令臣協剿湖州臣力實有不給若令臣棄湖州而赴金陵事體固分輕重時勢固有緩急臣敢不仰體

朝廷與督臣殷殷責望之意但使臣統兵遠去而湖賊窺伺入境孰與主持調度若僅分兵遠去少則無濟於事多則各統將資望相等號令不一與曾國荃各軍錯處圍城之下曾國藩與臣皆不放心且各軍礮隊現尚未齊將來湊齊時閒有雇用洋人教習恐亦非諸將所能節制籌思至再似乏兼全之術頃據郭松林等稟稱現在天氣炎熱洋鎗連放三四次即紅多則炸裂開花礮放至十數出後即不能著手昨攻長興各項礮具俱已震損亟須回蘇修整以後節交三伏戰事頗難亦係實在情形惟是疊奉嚴旨飭臣軍會攻金陵曾國藩兄弟又屢次檄調事關大局無論有濟與否必應竭力相助臣擬日內由太湖馳赴長興前敵察看軍情賊勢相機調撥仍即折回蘇城恭候諭旨酌奪辦理所有籌畫大概情形附片具陳伏乞

聖明訓示謹
奏

李文忠公奏稿卷六